

尚書集注述疏

尚書集注述疏卷二十五

周書

顧命

鄭氏曰。回首曰顧。臨終出命。故謂之顧命。蔡氏曰。成王將崩。命羣臣立康王。史敘其事爲篇。是也。康王之誥。史以附於篇末。故史連其文爾。伏生今文合之。則史之舊也。書序分康王之誥爲篇。非也。蓋武王之終。成王之始。流言之變。王室危矣。呂氏謂以是之故。此正其終始特詳焉。成王所以正其終。康王所以正其始。

述曰。說文云。顧。還視也。禮緇衣。稱葉公顧命。其例也。釋文

引馬云。成王將崩。顧念康王。馬以爲念者。顧之因也。鄭義見書疏。史記集解。梅本自王出在應門之內。已下爲康王之誥。書疏云。馬鄭本自王若曰已下爲康王之誥。伏生以此篇合於顧命。共爲一篇。繇疏言之。馬鄭本者。蓋古文本也。史記云。康王卽位。徧告諸侯。作康誥。卽康王之誥也。史遷蓋從序焉。朱子以爲除序讀之。文勢自連。則從伏生今文本也。定元年穀梁傳云。昭公之終。非正終也。定公之始。非正始也。昭無正終。故定無正始。此呂氏之義所繇也。

惟四月哉。生魄。王不懌。

懌音亦。

此史敘顧命之繇也。哉。始也。蔡氏謂始生魄。十六日也。不懌。不說也。蓋言疾危。猶金縢言弗豫也。疾危而惟曰不懌。

者。元吳氏謂臣子不忍斥言也。

說音悅

述曰。哉生魄。詳康誥疏。魄與霸通。劉歆以周公攝政七年。及反政後。成王卽政。始爲元年。蓋謂非卽位改元也。漢志稱三統術引此經而說之云。成王元年正月己巳朔。此命伯禽俾侯于魯之歲也。後三十年四月庚戌朔十五日甲子。哉生霸。蓋以此四月在成王卽政後三十年也。然經言哉生魄。又言甲子。則必非同日也。歆以爲十五日甲子。非也。且以成王卽政始爲元年。誣也。成王命伯禽俾侯于魯者。豈不在卽位改元之歲乎。詳洛誥疏。夫以漢志言之。則成王在位三十七年矣。竹書紀年云。成王三十七年陟。蓋僞者襲漢志爲之也。詩烈文疏。書疏引鄭云。此成王二十

八年居攝六年爲年端。鄭以爲成王三十七年去周公居東二年。及居攝七年。則二十八年矣。皆非也。詳金勝疏。居攝六年者。將致政之年。故鄭以爲改元年之見端爾。鄭於洛誥亦以爲卽政改元也。失之矣。劉恕通鑑外紀引王云。成王二十八年崩。蓋與鄭同。史記周本紀不詳成王之年。三代世表自共和以前亦不詳。蓋闕疑也。不懌釋文云。馬本作不釋。疾不解也。漢志引作王有疾不豫。蓋從今文也。詩頍弁云。庶幾說懌。則懌者說也。吳氏者澄也。元史有傳。稱元者以別宋吳棫之稱氏也。

甲子。王乃洮頍水。相被冕服。憑玉几。

洮音桃。頍音悔。相去聲。被皮義反。見音倚。

此言王將顧命而猶能敬也。洮頍皆水。馬氏謂洮髮頍面。

也。相者鄭氏謂正王服位之臣。謂大僕也。冕服蔡氏謂衮冕也。被者病不能服而覆其身也。憑玉几者將發命也。呂氏曰。甲子去崩纔一日爾。猶致潔致嚴。蓋臨衆之敬。不以困憊廢。豈一朝一夕之積哉。大音太纔音材憊蒲拜反

述曰。馬義見釋文。詩生民云。釋之叟叟。毛傳云。釋。浙米也。叟叟聲也。釋訓云。溼溼。浙也。郭注云。洮米聲。玉藻云。沐稷而醑梁。蓋洮者以浙米水沐髮也。漢志注云。沫。古醑字。說文云。沫。洒面也。類古文沫。段氏云。類。从水升頁。會意。兩手掬水洒面也。吳志注引虞翻別傳云。翻奏鄭解顧命。洮類爲濯。以爲滌衣成事。洮字虛更作濯。以從其非。誠可怪也。天子頽面。謂之滌衣。甚違不知蓋闕之義。此言鄭失也。段

氏云。爲濯。之上有脫文。當曰。洮。讀爲濯。周官守祧注云。古文。洮。爲濯。其例也。解爲黼衣。於事或乖。而黼衣自釋濯爾。非統類言之也。周官云。大僕掌正王之服位。禮檀弓云。扶君。卜人師扶右。注云。謂君疾時也。卜當爲僕。聲之誤也。鄭義見書疏。又鄭云。冕。元冕。今攷周官司服言冕服者六。元冕其下也。書疏謂顧命傳重。不惟服元冕而已。是也。覲禮云。天子設斧衣于戶牖之間。左右几。天子衮冕。負斧依書。疏据之。謂此旣憑玉几。明服衮冕也。此蔡義之所繇也。憑。佗經作馮。若易論語馮河。是也。說文引作凭。謂依几也。廣韻云。纔。僅也。易遯象傳云。有疾憊也。言疾困也。

乃同召大保。奭芮伯。彤伯。畢公。衛侯。毛公。師氏。虎臣。百尹。御事。

大音太夷音釋芮  
如銳反彤音同

此言王將顧命而召羣臣也。同召者謂一時同召之也。大保者召公也。不稱召公而稱夷者。特書名也。所以著一人爲四世之舊臣也。如書曰召公。則將疑其非一人矣。鄭氏曰。公兼官。以六卿爲正次。蔡氏曰。六卿。冢宰。召公。領之。司徒。芮伯。爲之。宗伯。彤伯。爲之。司馬。畢公。領之。司寇。衛侯。爲之。司空。毛公。領之。大保。畢。毛。三公兼也。芮。彤。畢。衛。毛。皆國名。諸侯入爲天子公卿是也。三公。大師。大傅。大保。其序也。今先大保者。各以其職任爲序。不以爵秩也。師氏。司王朝。所以察美善也。虎臣。虎賁氏。所以備非常也。皆顧命時之要職。故皆書官焉。百尹。百官之長。御事。治事之臣。統言而



同召之也。

大皆音太賁音奔長丁丈反

述曰。漢石經之殘者。有召大保之文。太不作太。蓋經之本文也。召公。詳召誥及君奭篇。詩有召南。言召公於文王時也。文武成康。則遞於四世矣。此詩卷阿序所稱召康公者也。詩江漢序。又稱召穆公爲召公焉。則非一人也。鄭義見詩淇奥疏。定四年左傳云。康叔爲司寇。緜今攷之。周官六卿之序。天地四時。秋官司寇。其次五也。經序衛侯。適其次焉。則其餘之序可知也。詩桑柔疏引鄭云。芮伯入爲宗伯。畢公入爲司馬。鄭不以芮伯次司徒。非其序也。於鄭言以六卿爲正次者。歧矣。殆詩疏所引之誤歟。君奭序云。召公爲保。周公爲師。隱五年公羊傳云。自陝而東者。周公主之。

自陝而西者。召公主之。蓋天下之二伯也。陳氏師凱云。畢公繼周公爲東方諸侯之伯。則亦必繼周公爲大師矣。其毛公爲大傅可知也。三公詳微子篇。三公兼官。漢謂之曰領。此以後而明前爾。書序云。芮伯作旅巢命。詩桑柔疏引鄭書序注云。芮伯。周同姓。國在畿內。書疏引世本云。芮。姬姓。今陝西同州府朝邑縣有芮鄉。漢志所謂故芮國也。書疏引王云。彤。姒姓之國。蓋據夏本紀禹後有彤城氏也。路史云。彤。伯爵。成王子。則以爲姬姓矣。今陝西同州府華州有彤城。通鑑胡注言彤國所在者以此也。史記魏世家云。魏之先。畢公高之後也。畢公高與周同姓。武王伐紂而高封於畢。今在陝西西安府長安縣西北。僖二十四年左傳。

言文之昭者十六國。畢毛在焉。是皆文王子也。路史云。毛伯國上邽。藉水旁。有毛泉。上邽者。今甘肅秦州也。然水經注言毛泉者。不言其爲毛國也。史記云。武王立于社南。毛叔鄭奉明水。蓋毛公也。定四年左傳云。聃季爲司空。又云。五叔無官。此聃季者。史記管蔡世家所謂聃季載也。杜五叔注有毛叔聃。而無曹叔振鐸。豈以顧命毛公次司空。而以爲毛叔聃歟。然則聃非無官也。豈此爲聃季注。而脫於五叔下歟。抑涉十六國毛聃爲文之昭者。而致譌也。詩淇奥序云。衛武公入相於周。此畿外諸侯之言入也。鄭語云。桓公爲周司徒。隱三年左傳云。鄭武公。莊公。爲平王卿士。皆其例也。以王朝言之。則畿內諸侯亦言入矣。周官云。師

氏掌以燬詔王居虎門之左。司王朝。燬古美字。虎賁詳立政篇。漢書古今人表有芮伯。師伯。毛公。師氏。龍臣。唐顏師古注云。師伯。尚書作彤伯。龍臣。尚書作武臣。孫氏云。蓋今文尚書也。唐諱虎曰武。班氏之表。以師氏。龍臣爲人名。不以爲官名也。

王曰。嗚呼。疾大漸。惟幾。病日臻。旣彌留。恐不獲誓言嗣。茲予審

訓命汝。

幾平聲

自此而下五節。敘成王之顧命也。漸進。幾危也。病者疾之甚。臻至。彌終。獲得也。嗣卽下文嗣德之嗣。訓卽文武大訓之訓。言今疾大進。惟危矣。病且日至。病旣不去而終留。恐不得誓言後嗣。此予審訓言以命汝羣臣也。蓋非誓而謂

之誓言者。明其言之謹信也。

述曰。易序卦云。漸者進也。幾危。臻至。釋詁文。論語云。子疾病。病者疾之甚也。彌終。釋言文。孫氏云。既命當終而淹留。當之爲言。於經病添文也。如曰既終而留。則不辭矣。凡田與戰之得者。皆曰獲。則獲者得也。曲禮云。約信曰誓。釋言云。誓謹也。

昔君文王武王。宣重光。奠麗陳敎。則肄肄不違。用克達殷集大命。重平聲肄以至反

宣著也。重光者。文武相繼爲重明也。蔡氏謂猶舜如堯謂之重華也。奠定也。麗猶依也。易之離曰。大人以繼明照于四方。又曰。重明以麗乎正。乃化成天下。蓋麗乎正。則定矣。

下文所以言自治威儀也。威儀卽自麗其身者也。肄習集就也。言先王文武著重明之光。定其明所麗者而敷教焉。則皆習之矣。習其教則不違之矣。以能通於殷而就大命也。蓋明而自麗。君之明依於仁。臣之明依於忠。父之明依於慈。子之明依於孝。皆明德之光也。皆定麗也。故以身教者從。繇是達之。化成天下。大命於以集焉。下文所謂誕受美若者。以此也。

述曰。宣著。詳皋陶謨疏。釋文引馬云。重光日月星也。太極上元。十一月朔旦冬至。日月如疊璧。五星如連珠。故曰重光。此馬据漢志以太初厯之厯元言之也。非文武之時也。且經於重光言宣者。言文武之德也。豈言文武之時乎。史

記云。虞舜者名曰重華。蓋重華者舜之號也。今於辯僞古文舜典者詳焉。纂定詳禹貢疏引易者離象傳及彖傳文。易晉彖傳云。順而麗乎大明。亦其所自麗者也。僞傳云。定天命。施陳教。則勤勞傳訓麗爲施也。釋文云。麗力馳反。蓋讀若詩魚麗之麗矣。毛傳云。麗庶也。豈訓施乎。其言定天命於經病添文也。詩谷風毛傳云。肄勞也。以言此經非也。蔡傳云。麗依也。定民所依。陳列教條。則民習服。蔡据多方所謂民之麗也。然不自重光言之。於義未融也。說文云。肄習也。江氏云。重言肄者。病甚而語吃也。此以漢書周昌傳所謂期期者推之也。非也。其義當承而言之也。若中庸所謂明則動動則變也。漢石經達作通。集作就。蓋文異而義

不異也。說文云。達通也。詩小旻云。是用不集。毛傳云。集就也。韓詩外傳集作就。蓋古音同。故義通也。詩大明云。有命既集。毛傳與小旻傳同。

在後之侗。敬迓天威。嗣守文武大訓。無敢昏逾。

侗音同迓音訝逾音踰

此承上文集大命而言。侗。蔡氏謂愚也。成王自稱。迓。迎也。天威者。卽大命之威也。大訓者。卽所以集大命之教也。蔡氏謂大訓。述天命者是也。下文所謂皇天用訓厥道也。逾。越也。言敬迎天命。繼守文武大教。無敢昏而越之。蓋恐失其重光也。

述曰。揚子寔言云。倥侗頡蒙。蓋侗者。愚也。釋文云。馬本作詢。謂共也。徐鍇本說文。引周書曰。在後之詢。徐鉉本所引。



者。后上多夏字。蓋後作后者。古通也。夏衍文。詞則侗之假借爾。江氏云。夏中夏也。后謂諸侯。言在中夏諸侯之共主。非也。主之爲言。於經病添文也。且成王無自稱之辭。上下經文。皆不貫也。迓。迎。釋詁文。迓。古通訝。儀禮訝賓。周官訝士。其例也。段氏云。迓。天寶以前必作御。今本衛包改之也。御。訓治。謂用天威治民也。卽訓迎。亦當作御。非也。經不言民。今豈當曰敬治天威乎。則訓迎必矣。鄭曲禮自御注云。御。當爲迓。迓。迎也。然則此經作迓是也。豈衛包改之乎。說文云。迓。遽進也。引此經而說之。遽。猶越也。

今天降疾。殆弗興弗悟。爾尙明時朕言。用敬保元子釗。宏濟于

艱難。

釗音昭。

殆者蔡氏謂殆將也。興起。悟覺也。元子。大子也。稱元子者。蔡氏謂正其統也。釗。康王名。言天今降我疾。殆將寢疾而不起不覺矣。爾庶幾明是我言。以敬保大子釗。大濟于王事艱難也。大子之大音太

述曰。禮檀弓言孔子云。予殆將死也。蓋寢疾七日而沒。僞傳云。今天下疾危殆。蓋從殆絕句焉。非也。王憑玉几以言。今且興而悟矣。慮其殆將弗能也。興起。釋言文。悟與寤通。詩考槃毛傳云。寤覺也。釋文云。覺交孝反。又如字。詩兔爰云。尙寐無覺。謂死也。

柔遠能邇。安勸小大庶邦。思夫人自亂于威儀。爾無以釗冒貢于非幾。夫音乎。幾平聲。

此顧命之大要也。柔安。運近也。說詳堯典。安何也。禮曰。安取彼。思夫。猶思乎也。亂治也。有威而可畏。謂之威。有儀而可象。謂之儀。蔡氏謂人受天地之中以生。是以有動作威儀之則。自治者正其身而不假外求也。冒蒙而前也。貢進也。非幾不善之幾也。蔡氏謂幾者動之微。而善惡之所由分也。非幾則發於不善而陷於惡矣。威儀舉其著於外者而勉之也。非幾舉其發於中者而戒之也。威儀之治。皆本於一念之微。孔子所謂知幾也。言能安遠者。先能安近。今何以勸小大衆邦。必思乎人自治于威儀。爾羣臣毋以剋蒙而前進于不善之幾。蓋庶邦遠也。威儀近也。幾尤其近也。苟有非幾。當明而先止之。斯自治其近者而已。柔安矣。

於是乎其遠者勸焉。則人亦柔安也。所謂莫麗陳敎則肄  
肄不違也。威儀自麗其身。今自治而莫定之。是以身敎也。  
孰不勸而肄習不違乎。此卽文武大訓。而顧命則審訓命  
之者也。皋陶謨曰。庶明厲翼。邇可遠在茲。又曰。無敎逸欲  
有邦。兢兢業業。一日二日萬幾。皆思乎此也。此詩言文王  
者。所以言萬邦作孚也。孟子言武王者。所以言不泄邇不  
忘遠也。大學言平天下者。所以言皆自明也。中庸言慎獨  
者。所以言知遠之近。知微之顯也。○謹案自治威儀。而以  
柔安言之。何也。衛武公之詩曰。敬爾威儀。無不柔嘉。蓋其  
思自治之敬也。其柔安之道與。尹吉甫之詩曰。仲山甫之  
德。柔嘉維則。又曰。威儀是力。故曰。衮職有闕。維仲山甫補

之。蓋其補非幾之闕也。其皆柔安之道與。斯道也。非卽成王之死而不忘者乎。蘇氏曰。死生之際。聖賢之所甚重也。成王將崩之一日。被冕服以見百官。出經遠保世之言。其不死於燕安婦人之手也。明矣。其致刑措宜哉。呂氏曰。曾子將終。以示孟敬子。皆近在於威儀容貌顏色辭氣之間。然則道之同也。泄音薛

述曰。引禮者曲禮文。疏云。安取彼。猶何取彼。蓋以安爲何也。易同人象傳疏同。論語云。安見方六七十。如五六十。而非邦也者。亦其例也。僞傳云。安小大衆國。勸使爲善。蔡傳云。安寧勸導。小大不可偏。皆於文未適也。釋詁云。柔安也。今言柔又言安。豈複也乎。此以安爲何。與所謂思夫者爲

呼應之辭。上下經文。皆相貫也。易繫辭傳云。履信思乎順。蓋諸經以夫爲語助者。多與乎同。有威而可畏。謂之威。有儀而可象。謂之儀。襄三十一年左傳文。蓋古訓也。成十三年左傳云。民受天地之中以生。所謂命也。是以有動作禮義威儀之則。蓋民者人也。猶詩稱先民。統君臣而言也。僞傳云。羣臣宜思夫人。夫人自治於威儀。然後足以率人。汝無以釗冒進於非危之事。此傳讀夫若扶也。論語云。夫人不言。其例也。釋文云。夫人如字。注同。非也。此据召誥傳。夫讀如字。而失之也。蔡傳云。成王思夫人之所以爲人者。自治於威儀爾。蔡以思夫爲言。與傳言夫人者不同。言人自亂于威儀。猶商書言人自獻于先王也。蔡以思自成王言。

之。若成王至是乃思之者。於義未融也。傳以思自羣臣言之。於義未悉也。經固統釗與羣臣言之也。傳釋幾爲危。書疏謂非事危事。以事言之。於經病添文也。釋文云。冒馬鄭王作勛。蓋異文也。或曰。於非幾言勛勉者。猶盤庚言勸憂也。釋文云。貢馬鄭王作贛。馬云。陷也。江氏云。說文。陷作贛。故馬義然也。又云。冒觸也。周語云。宜觸冒人。非幾不善也。易繫辭傳云。幾者動之微。吉之先見者也。說文云。吉善也。然則幾爲善矣。幾爲善。則非幾爲不善矣。言女毋以釗觸陷于不善。此江氏之申馬義也。繇今攷之。易繫辭傳云。知幾其神乎。蓋知幾則有吉無凶。故曰吉之先見者也。豈謂幾之必吉邪。幾者動之微。非幾猶未陷也。蒙而前進。則陷

矣。蔡義與馬義不同。而該馬義於其中也。說文云。冒。冢而前也。冢。今作蒙。言蔽其目也。襄四年左傳云。冒于原獸。杜注云。冒。貪也。蓋貪于原獸。則蒙而前矣。凡物之上進者。皆曰貢。則貢者進也。或曰。周語云。國之將亡。其君貪冒辟邪。文十八年左傳云。貪于飲食。冒于貨賄。杜注云。冒亦貪也。詩楚茨毛傳云。幾期也。孟子云。不及貢。謂不及貢期也。以言此經。言汝無以釗貪貢于非期。此古說也。史記言顧命者云。申告以文王武王之所以爲王業之不易。務在節儉。毋多欲。以篤信臨之。今顧命中。惟冒爲多欲之義爾。釋文云。冒。一音墨。是古說以爲貪墨也。今不從者。於義未深也。君子防微。有止欲於其先者矣。引萬邦者。詩文王文。孟子



趙注云。泄。狎也。朱子云。邇者人所易狎。蓋非幾所繇動也。引威儀者。詩抑及烝民文。鄭箋云。柔安也。又云。嘉美也。毛傳云。有袞冕者。君之上服也。仲山甫補之。善補過也。鄭箋云。袞職者。不敢斥王之言也。莊三十二年。穀梁傳云。男子不絕於婦人之手。以齊終也。范注云。齊。絜。蓋正其終也。史記云。成康之際。刑錯四十餘年不用。錯與措通。

茲旣受命。還。出綴衣于庭。越翼日乙丑。王崩。

還音旋

此言旣顧命而王崩也。還者。羣臣退也。綴衣。謂所聯綴之室衣。出者。徹之也。庭。謂路寢之庭。蔡氏以爲若喪大記。疾病。君徹縣者。是也。翼日。明日也。天子死曰崩。縣音懸述曰。綴衣。詳立政篇。春秋。莊公三十有二年。八月。癸亥。公

斃于路寢。穀梁傳云。路寢。正寢也。寢疾居正寢。正也。則王崩可知也。周官小胥云。王宮縣。諸侯軒縣。蓋樂縣也。疾病則徹焉。天子死曰崩。曲禮文。周官幕人疏引鄭云。連綴小斂。大斂之衣于庭中。蓋鄭讀曰還出。失之矣。下文何以言設綴衣于大斂後乎。禮檀弓云。喪具。君子恥具。一日二日而可爲也者。君子弗爲也。注云。辟不懷也。王制云。六十歲制。七十時制。八十月制。九十日修。惟絞紵衾冒死而後制。此大夫以下且然。況於王乎。江氏以鄭說爲豫凶事。是也。釋文云。王崩。馬本作成王崩。馬云。安民立政曰成。馬之釋成。從周書諡灋也。漢志。白虎通所引者。與馬同。周官鄭司農注。於司几筵引有成字。於天府引則無之。蓋異文也。或

曰成者王生稱之也。蓋生號也。沒以爲諡焉。呂氏春秋云。文王造之而未遂。武王遂之而未成。周公抱少主而成之。故曰成王。史記魯世家云。周公誡伯禽曰。我文王之子。武王之弟。成王之叔。此成者王生稱之也。非也。此史之追稱云爾。史記晉世家云。蕭桐姪子。頃公母。頃公母猶晉侯母。蓋頃公母者史之追稱。左傳本稱寡君之母也。漢本紀云。家令說太公曰。今高祖雖子。人主也。漢書改高祖爲皇帝。從本稱也。史之追稱。古有之矣。左傳云。陳桓公方有寵于王。其例也。詩序云。昊天有成命。郊祀天地也。其詩云。二后受之。成王不敢康。周語引此詩而釋之云。是道成王之德也。成王能明文昭。定武烈者也。韋昭云。謂文武成其王功。

非謂周成王身也。詩鄭箋與周語義同。此猶酒誥言殷者亦言成王德顯也。賈誼新書云。昊天有成命。頌之盛德也。二后。文王武王也。成王者武王之子。文王之孫。非也。郊祀之詩。必周公相成王爲之也。制禮作樂。孰大於是乎。必非遯康王爲之也。旣爲成王郊祀之詩。雖成王生有其稱。若商頌。湯稱武王者。亦豈稱之以郊祀哉。曲禮云。父前子名。王之事天。猶事父也。是未可据詩以爲生號也。且生號亦不然矣。經下文言新陟王。此進告者所稱也。以王崩未諡亦無生號也。苟有生號。則進告者當從之稱成王矣。何以稱曰新陟王乎。然而今又不從成王爲追稱者。何也。春秋書崩者。書曰天王崩。則史稱王崩者。於文尤適也。

大保命仲桓。南宮毛。俾爰齊侯呂伋。以二千戈。虎賁百人。逆子  
釗于南門之外。延入翼室。恤宅宗。

賁音奔。

此言卽特禮而主喪也。稱大保命者。蔡氏謂以冢宰攝政也。仲。南宮氏也。桓。毛其名。此二人。卽上文所謂虎臣也。故以二千戈而率虎賁焉。周官。虎賁氏。下大夫二人。虎士八百人。今百人。其尤者也。俾。使。爰。引也。呂氏也。姜姓之後。伋其名。稱齊侯呂伋者。明其爲王舅也。成王母邑姜。齊大公呂望之女。伋。大公之子。丁公也。逆。迎也。范氏謂特出而迎之。所以顯之於衆。是也。經言逆。不言出者。非闕文也。繇上文可知也。上文顧命所言者。皆元子釗本在之辭。不言召立焉。今而逆之。則其出可知也。此古史之簡而明也。子釗

者王在喪之稱。蓋稱子稱名。若親存也。南門。謂外朝所在之皋門。蓋王朝五門。皋門爲至南。故又名之曰南門。南門之外。萬民所聚也。延。進也。從後詔禮曰延。翼室。謂路寢之東夾室。蓋初喪未諒闇也。恤。憂。宅。居。宗主也。謂進入夾室。變居主喪焉。蓋迎而進之者。齊侯也。萬民聚觀。非虎臣衛之不肅也。所命三人。書氏。書名。慎其人也。此大保召公戒於流言之變而爲之也。周官。小司寇掌外朝之位。以致萬民而詢焉。其三曰詢立君。今王立元子釗。則無詢矣。然萬民於子釗猶未覩也。非釋衆疑之道也。今自南門而出入焉。是歷乎外朝致萬民之所也。萬民不昭然哉。呂氏曰。發命者家宰。承命者勳戚顯諸侯。慮患深矣。入自端門。萬民

咸覩與天下共之也。延入翼室。爲憂居之宗。示天下不可  
一日無統也。唐穆敬文武以降。闕寺執國命。易主於宮掖。  
而外廷猶不聞。然後知周之制不可廢也。大公之大音太  
朝直遜反諒闕

皆平聲  
闕音奄

述曰。仲氏者。隱八年左傳所謂以字爲氏也。君奭稱南宮  
括。則毛蓋賢臣之後也。漢書古今人表作中桓。南宮髦。蓋  
異文也。周官虎賁氏云。國有大故。則守王門。大喪亦如之。  
其下旅賁氏云。喪紀則執戈盾。蓋以旅助乎虎賁也。俾使  
釋詁文。說文云。爰引也。故援者以手引之也。周語云。祚四  
嶽國。賜姓曰姜氏。曰有呂。蓋呂者。四嶽之後也。昭十二年  
左傳云。齊王舅也。傳自呂伋事康王者。言之也。杜注云。成

王母齊大公女。此昭元年左傳所謂武王邑姜也。史記齊世家云。大公卒。子丁公呂伋立。蓋齊侯也。釋詁云。爰于也。又云。于。於也。僞傳云。使桓毛二臣各執干戈於齊侯呂伋索虎賁百人。伋爲天子虎賁氏。非也。周之兵。司馬掌之。虎賁氏屬焉。當是時。領司馬者畢公也。虎賁氏秩下大夫。今勲戚顯諸侯如呂伋者。豈入而兼爲之乎。如兼爲之。何以大保不卽命呂伋乎。索之爲言。於經病添文也。逆迎。說文義也。范氏者。祖禹也。宋史有傳。莊三十二年公羊傳云。君存稱世子。君薨稱子某。旣葬稱子。踰年稱公。則王崩可推也。此所稱者。謂其民臣稱之也。文九年公羊傳云。以諸侯之踰年卽位。亦知天子之踰年卽位也。以天子三年然後



稱王。亦知諸侯於其封內三年稱子也。踰年稱公矣。則曷爲於其封內三年稱子。緣民臣之心。不可一日無君。緣終始之義。一年不二君。不可曠年無君。緣孝子之心。則三年不忍當也。此所稱者。謂天子諸侯之自稱也。故白虎通釋之云。謂稱王發號令也。若夫經下文稱子釗爲王者。何也。春秋繁露云。天子三年然後稱王。經禮也有故。則未三年而稱王。變禮也。康王以子繼父。非有他故。而稱王者。史臣之辭也。詳下文疏。僞傳云。臣子皆侍左右。將正大子之尊。故出於路寢門外。蔡傳言路寢門者。略同。繇今攷之。路寢門者。經稱之曰畢門。不稱南門也。外朝詳召誥攷位疏。五門詳下文疏。或曰。此大子在外奔喪而逆之也。無逸云。其

在高宗時舊勞于外。則太子有在外者。如其說。則成王之命。何以不言召立元子釗邪。覲禮云。擯者延之曰升。注云。從後詔禮曰延。釋詁云。延進也。喪禮既殯。居倚廬。蓋在門外之東。所謂諒闇也。今未殯。居翼室。必路寢之東矣。夾室東西。如鳥之翼也。喪大記云。既正尸。子坐于東方。卿大夫。父兄子姓。立于東方。則此之居東可推也。喪大記注云。正尸者。遷尸牖下南首也。白虎通言宗族云。宗尊也。爲先祖主也。蓋尊之所以主之也。漢書周勃傳云。謁者持戟衛端門。今言端門。以明南門之正爾。唐穆宗。敬宗。文宗。武宗。此四世也。闕寺者。蓋周官奄人寺人也。唐之宦官。其職也。若敬宗卽位二年。宦官劉克明等弑帝。立絳王悟。宦官王

守澄等討克明。殺悟立江王涵。卽位。是爲文宗。若武宗疾不能言。宦官定策立太叔忱。帝崩。太叔忱卽位。是爲宣宗。若懿宗崩。宦官立少子普王儼爲太子。卽位。是爲僖宗。皆閹寺執國命者也。見新舊唐書。

丁卯。命作冊度。

此將傳顧命而先有作也。丁卯。主崩之三日也。命者承上文大保而言。其命於三日者。宋王氏謂大斂後也。冊者顧命之書冊也。命大史作之。度者。傳冊之禮度也。命大宗作之。經不言所命者。皆見下文也。禮以義起。故謂之作。

述曰。儀禮士喪禮。自死之日言之。厥明。小斂。又厥明。大斂。而儀禮無言天子之喪者。於是乎言天子斂日異矣。王氏

安石云。尊卑皆同。故以丁卯爲大斂日焉。書疏於下文引鄭云。癸酉。蓋大斂之明日也。今攷王制云。天子七日而殯。王以乙丑崩。辛未爲七日。壬申爲八日。鄭以大斂與殯同日。而云然者。曲禮云。生與來日。死與往日。鄭注云。與猶數也。生數來日。謂成服杖。以死明日數也。死數往日。謂殯斂。以死日數也。此士禮貶於大夫者。大夫以上皆以來日數。今鄭不數乙丑。則壬申爲七日。是癸酉爲大斂之明日也。然曲禮下文。不曰知生者弔。知死者傷乎。生者與之來日。故弔之。死者與之往日。故傷之。豈如鄭說乎。孝經云。三日而食。敎民無以死傷生。毀不滅性。此聖人之政也。中庸云。父母之喪。無貴賤一也。夫三日而食。非以旣大斂乎。如天

子以七日大斂。且以來日數也。是八日而食矣。其不毀而滅性乎。僞傳云。命史爲冊書灋度。蔡傳同。書疏云。經不言命史。史是常職。不假言之。非也。經何以言命士須材乎。周官內史掌策命。疏固据言之矣。而疏云。旣作策書。因作受策灋度。絲是言之。是豈史兼作之乎。策與冊通。

越七日癸酉。伯相命士須材。

相去聲

此本書其傳顧命之日。而先於是日言喪紀也。癸酉旣殯之二日也。言大保。又言伯相者。互文相備也。蔡氏謂召公以西伯爲相也。周官山虞之屬皆士爲之。故今命焉。須需也。言待用而取之也。材。謂材木。將以爲槨也。禮曰。旣殯。旬而布材。謹案下文所敘者。陳設而傳顧命。遞乎朝享而

反喪服。皆癸酉之日也。蓋自丁卯之日。凡所命者。作冊焉。作度焉。其事以七日而皆豫矣。其陳設之文雖繁。其行禮之節實簡。固可行之一日閒也。何疑於冊命之重而史不日哉。先儒以爲闕文。非也。癸酉之日。先命頒材者。喪事嚴也。其陳設卽於癸酉之日者。神席不可以先虛。重器不可以遽襲。崇敬之道也。襲先結反

述曰。周官大宗伯云。九命作伯。注云。謂上公有功德者。加命爲二伯。蓋東伯西伯也。隱五年公羊傳云。三公者何。天子之相也。書疏引王云。召公爲二伯。相王室。故曰伯相。蔡言西伯者。据下文大保率西方諸侯也。或曰。相卽相被冕服之相。伯其長也。非也。材木。蓋送死之大事。豈不以冢宰

命之乎。且士者統百祀虞人而言也。非冢宰何以能命之乎。周官云。山虞每大山中士四人。下士八人。令萬民時斲材。有期日。林衡每大林麓下士十有二人。若斲木材則受灋於山虞而掌其政令。此士之職也。易彖傳云。需須也。今轉注之。引禮者檀弓文。注云。材。槨材也。檀弓云。君卽位而爲椁。歲一漆之。藏焉。此言棺也。又云。天子崩。虞人致百祀之木。可以爲棺槨者。斬之。此言棺之槨也。疏云。百祀者。王畿內諸臣采地之祀。必取祀木者。賀瑒云。君存則人神均慶。沒則等其哀傷。是也。充虞問於孟子云。使虞敦匠事。嚴虞不敢請。謂材木之事也。此喪紀不可緩者也。

狄設黼展綴衣。

展依上聲

自此而下八節。方傳顧命而陳設之度也。狄者蔡氏謂供役者也。喪大記曰。狄人設階。不言命狄者。統於上文命作冊度之中也。展者依也。黼展者。繪繡爲斧文之飾。在王位後而依之也。禮說以爲如屏風然。蓋狄之所設者。設於路寢。如王生時。經先言此者。以四嚮皆兼設之也。蔡氏謂不知神之在此乎。在彼乎。故兼設之也。依如字

述曰。祭統云。翟者樂吏之賤者也。翟與狄通。蓋吏役通稱也。書疏云。狄設亦伯相命之。不言所命。從上省文也。疏言省文是矣。其言伯相命之。於義未悉也。論語云。簋豆之事。則有司存。此從上之作冊度者命之爾。釋器云。黼謂之斧。詳皋陶謨篇。展。漢石經作衣。蓋衣者依也。亦展之義也。釋



宮云。牖戶之閒。謂之展。書疏引李巡云。謂牖之東戶之西。是也。展與依通。周官司几筵云。王位設黼依。注云。依之制如屏風然。蓋以漢制明之也。黼依者。覲禮所謂斧依也。展以戶牖之閒而名。本其初言之爾。其後隨王位所依而設焉。經下文不惟言牖閒者。以此也。禮郊特牲云。不知神之所在。於彼乎。於此乎。此蔡義之所繇也。

牖閒南嚮。敷重篋席。黼純華玉仍几。

重平聲。篋眠結反。純中盾反。

牖戶之閒。謂之展。此黼展之正位也。蓋路寢之北。其中爲室。室南其戶。戶東而牖西。故黼展在其閒。則南嚮焉。經不言戶閒。省文也。敷布也。篋。鄭氏謂析竹之次青者。是也。蓋滅上青而取次青。編以爲席。蔡氏謂桃枝席也。禮曰。天子

之席五重。今布而重之。篋席則其上重也。周官所謂加次  
席黼純也。白與黑謂之黼。緣謂之純。席飾也。華玉美采之  
玉。几飾也。仍因也。蔡氏謂因生時所設也。周官曰。凶事仍  
几。是也。蓋事死如事生。欲其神之來安也。王氏謂此見羣  
臣覲諸侯之坐也。緣去聲

述曰。牖戶之間謂之展。釋宮文。蓋爾雅釋宮。言禮者必稽  
焉。朱子脩儀禮釋宮一篇。其大略也。今言路寢者。資之矣。  
周官司几筵注。引嚮作鄉。說文。引敷作布。鄭義見書疏。禮  
器疏。引鄭云。不用生時席。新鬼神之事。故也。非也。周官司  
几筵云。凡大朝覲。大饗射。凡封國命諸侯。王位設黼依。依  
前南鄉。設莞筵。紛純。加纁席。畫純。加次席。黼純。左右玉几。

先鄭云。紛讀爲粉。謂白繡也。後鄭云。紛如綬有文而狹者。纁席。削蒲蕸展之。編以五采。專謂雲氣也。次席。桃枝席有次列成文。今攷桃枝竹也。釋草云。桃枝四寸有節。蓋其宜於篋者也。篋。說文引作蔑。則文之假借爾。必謂文不從竹而改蔑者。固也。說文云。蔑席。纖蕸席也。讀與蔑同。絲是推之。易剝初六云。剝牀以足。蔑貞凶。象傳云。以滅下也。今析竹者。剝而滅之。故爲篋焉。釋文引馬云。篋。纖蕸也。引禮者。禮器文。周官司几筵云。掌五席之名物。明王位之席五重也。蓋筵席通稱。延之。則爲筵矣。藉之。則爲席矣。詩行葦云。肆筵設席。其義也。詩斯干云。下莞上簟。言寢席也。而坐席可推矣。今以敷重言之。其下莞筵一重。其上纁席再重。又

其上次席再重。是以三爲五也。白與黑謂之黼。攷工記文。緣謂之純。釋器文。仍因釋詁文。周官司几筵云。凡吉事變几。凶事仍几。注云。吉事王祭宗廟。每事易几。神事文。示新之也。是矣。又注云。凶事謂凡奠几朝夕相因。喪禮略。非也。鄭於此經。篋席。又何以言新之。而不言略之者乎。喪禮。凡復。必以死者之衣。求之以生時之常也。今仍几亦然也。書疏於僞傳言四坐者。謂王肅說皆同。蓋襲王爲之也。

西序東嚮。敷重牀席。綴純文貝仍几。牀之履反

東西牆謂之序。蓋路寢室外之堂。東西牆也。經自西序而東序者。以王殯在西階之上也。牀平也。謂蒲平。馬氏以爲青蒲。是也。綴表也。聯綴之以表其外。謂績繡也。周官所謂

蒲筵續純也。凡黼紛皆畫而後續。經分言之者。互文也。文  
貝者。若餘蜺之貝黃白文。餘泉之貝白黃文。可爲飾也。鄭  
氏謂此旦夕聽事之坐也。續音繪  
蜺音池

述曰。東西牆謂之序。釋宮文。郭注云。所以序別內外是也。  
禮檀弓云。周人殯於西階之上。蓋殯時尚西也。詩大東云。  
周道如砥。毛傳以砥平釋之。孟子引作底。則底者平也。釋  
名云。蒲苹以蒲作之。其體平也。苹本作平。太平御覽引說  
文云。藟蒲子。可以爲平席也。世謂蒲平。馬義見釋文。書疏  
引鄭云。底致也。篋織致席也。致與緻通。說文云。緻密也。絲  
鄭言之。則篋其未致矣。夫篋有其致者。上文稱篋席。奚以  
知其未致也。牖閒之席。正位也。反不設其致者乎。詩長發

云。爲下國綴旒。毛傳云。綴表也。大戴禮盛德篇云。赤綴戶也。白綴牖也。蓋聯綴之以表其外也。周官司几筵云。蒲筵。纁純。注云。纁。畫文也。然畫純爲畫矣。何纁純亦爲畫乎。或曰。釋言云。畫。形也。蓋畫成形者。攷工記云。山以章。水以龍。所謂畫也。纁。分次者。攷工記云。青與白相次也。赤與黑相次也。所謂纁也。繇今攷之。所引攷工記者。其上文云。畫纁之事。雜五色。其下文云。凡畫纁之事。後素功。其貫於上下文云。五采備。謂之繡。蓋統言之。非析言之也。賈疏云。以纁繡皆畫之。又云。凡繡亦畫乃刺之。是也。互詳皋陶謨疏。周官司几筵。所謂純者。有四焉。紛。畫繡。纁也。惟無所謂綴純者焉。蓋綴純者。其纁純也。爾雅釋魚云。餘蜺。黃白文。餘泉。

白黃文。蓋貝之稱名者凡十。斯二者則以文稱也。書疏於  
偽傳言此坐者。謂鄭王亦以爲然。蓋王與鄭同。而偽者襲  
之也。儀禮士相見禮云。凡燕見于君。必辯君之南面。若不  
得。則正方不疑君。君在堂。升見無方階。辯君所在。注云。辯  
猶正也。君南面。則臣見正北面。君或時不然。當正東面。若  
正西面。不得疑君所處。邪鄉之。此謂特見圖事。非立賓主  
之燕也。疑度也。升見升堂。見於君也。君近東。則升東階。君  
近西。則升西階。繇是言之。則旦夕聽事。非必東嚮也。而可  
於東嚮言之矣。鄉與嚮通。

東序西嚮。敷重豐席。畫純。雕玉仍几。

雕多條反

豐茂也。謂豐草。王氏以爲豐莞是也。周官所謂莞筵也。畫

雜五色。將續則先畫也。雕琢也。王氏謂此養國老饗羣臣之坐也。莞音官

述曰。豐茂。釋詁文。詩湛露云。在彼豐草。言其茂也。釋草云。莞苒離。又云。蘆鼠莞。郭注皆以莞席言之。詩斯干箋云。莞小蒲之席也。夫草之小者亦茂。故曰豐焉。易彖傳云。豐大也。六二云。豐其蔀。釋文云。蔀鄭作菩。謂小席。說文云。菩草也。書疏引鄭云。豐席刮凍竹席。或曰。說文云。凍冰也。又云。刷刮也。則刮亦刷也。周官云。凌人秋刷。言刷冰也。鄭以言竹席之光寒也。今不從者。以言乎豐於文未洽也。書疏引鄭云。畫純似雲氣。畫之爲緣。鄭自一端言之爾。釋器云。玉謂之彫。彫謂之琢。雕與彫通。禮文王世子云。始之養也。適



東序釋奠於先老。遂設三老五更羣老之席位焉。注云。三老五更各一人也。皆年老更事致仕者也。名以三五者。取象三辰五星。此天子之養國老者也。饗禮大於燕。今言饗者。舉其大也。饗禮今亡。燕禮云。小臣設公席于阼階上。西鄉。設加席。公升。卽位于席。西鄉。蓋阼階在東序前也。此諸侯之燕羣臣者也。鄉與嚮通。繇是推之。則王之燕可推也。則王之饗亦可推也。

西夾南嚮。數重筍席。元紛純漆。仍几。

夾工洽反。筍詢上聲。又音筠。紛音分。漆音七。

西夾。謂路寢西序外之夾室。所謂翼室也。不設東夾席者。王方恤宅其中也。筍。竹萌。其皮爲筍箬。宜編席焉。馬氏謂筍箬箬也。筍。古通筠。析之。亦宜編席焉。鄭氏謂筍。析竹青。

皮也。禮器曰。如竹箭之有筠。元紛。鄭氏謂元組也。漆木汁。可繫飾者。王氏謂此親屬私宴之坐也。音蕭侯反。筭音弱。繫音油。

述曰。禮雜記有夾室之稱。夾室者。自東堂西堂言之也。書疏以爲夾中央之室。非也。儀禮公食大夫禮云。大夫立於東夾南。今經言西夾。則東夾可推也。或曰。夾非夾室也。夾者。東西序外之稱爾。聘禮。宰夫設飧。堂上之饌八。西夾六。蓋西夾亦西堂上也。如其說。則經何以無東夾席乎。經所謂翼室者。安在乎。夾室豈不可與堂通乎。筭竹萌。釋草文。馬義見釋文。說文云。筭竹筭也。又云。楚謂竹皮曰筭。蓋馬以爲筭之籜皮也。鄭筭義見禮器疏。周官均人公旬注云。旬。均也。易坤爲均。今書亦有作旬者。蓋古通也。今以說文

遺筠字焉。必謂禮器之文後改者。固也。經下文云。一人冕。執劉。說文亦遺劉字焉。幸而漢天子姓劉氏。皆知其所遺。爾。否則不又疑之乎。禮器釋文云。筠。于貧反。鄭云。竹之青皮也。顧命釋文於馬義云。筍。息允反。又引徐云。子竹爲席。于貧反。蓋徐氏邈之說也。僞傳云。筍。弱竹。徐氏以爲子竹者。猶傳意也。然子竹爲席。則編之而不析者。將何以純之乎。鄭紛義。見書疏。說文云。組。綬屬。鄭周官司几筵注。所以言紛如綬也。漆者。漆之假借也。說文云。漆。木汁。可以繫物。象形。漆如水滴而下。蓋詩之所謂漆也。周官大宗伯云。以飲食之禮。親宗族兄弟。詩序云。湛露。天子燕諸侯也。其詩云。厭厭夜飲。在宗載考。鄭箋云。夜飲之禮。在宗室。同姓諸

侯則成之。蓋私燕在室中也。宴與燕通。詩采蘋云。于以奠之。宗室牖下。此大夫之禮也。況天子宗室。其牖下豈私燕乎。明必在夾室也。詩楚茨云。備言燕私。此祭畢之燕。則存乎東序矣。與此宴於無事者不同。儀禮特牲饋食禮云。祝命徹俎俎豆籩。設于東序下。注云。俎俎主人之俎。設于東序下。亦將燕也。此士之祭畢之燕也。不旣在東序乎。況王之燕乎。

越玉五重。陳寶赤刀。大訓宏璧。琬琰在西序。大玉夷玉。天球河圖在東序。重平聲琬音宛琰以冉反

越踰也。五重之玉不名者。所寶非在此玉也。蓋古者布席於地。如陳寶席上。則已卑矣。今席置重玉。踰玉之五重。而

陳赤刀諸寶於其上焉。所以成大觀也。赤刀者。若公劉之詩所謂鞞琫容刀也。赤者。刀飾。周尙赤也。大訓者。上文所謂文武之大訓也。蓋堯舜禹湯之道。皆於大訓傳之矣。宏璧。大璧也。琬圭也。琰亦圭也。大玉與夷玉相次。蓋視夷玉尤遠者。若周書王會篇。稱伊尹四方獻令。謂正北以白玉爲獻也。夷玉。鄭氏謂東北之珣玕琪也。天球。蔡氏以爲鳴球是也。蓋球之天成。非人爲者。故寶之也。河圖者。易所謂河出圖。聖人則之也。禮曰。河出馬圖。蓋龍馬負圖。神物之寶也。陳寶以重玉藉之。在西序者。陳東嚮之前。在東序者。陳西嚮之前。皆以北爲上。蓋牖閒南嚮故也。史於北面敘之。則自下而上矣。寶莫重於大訓焉。成王嗣守大訓者也。

今殯於西階之上。故西序所陳大訓正東嚮之中。貴其爲文德之本也。知大訓必正中者。以大訓旣不在上。必不可在下也。其上大璧琬琰。貴其爲文德之器也。其下赤刀。貴其爲武功之用也。正中而上文下武。王者之治也。赤刀於下。衡陳之。則可以配其上矣。或赤刀不一而配之也。東序不正西嚮之中。以明西序大訓正中之獨尊也。東序惟以上下言之。河圖神物。故上焉。天球亦神物。故次上焉。貴其爲文德之象也。夷玉遠物。故下焉。大玉尤遠物。故至下焉。王者不荒於遠也。必陳遠物者。貴其爲文德服遠人之效也。上文所謂柔遠能邇也。周官天府之職曰。凡國之玉鎮大寶器藏焉。若有大祭大喪。則出而陳之。楊氏以爲示能。

傳者是也。○謹案易曰。古者包犧氏之王天下也。仰則觀  
象於天。俯則觀法於地。觀鳥獸之文。與地之宜。近取諸身。  
遠取諸物。於是始作八卦。此河圖爲作八卦者。觀法之文  
也。非河圖卽八卦也。河圖蓋周衰亡之不傳久矣。今以易  
大衍之數。所謂五位者。列而爲圖。一六位於北。二七位於  
南。三八位於東。四九位於西。五十位於中。此固易之圖也。  
古如有是圖。當在大訓中矣。蓋書策之圖。猶洛誥所謂圖  
也。非所謂河圖也。況其推易緯而圖之。乃謂神物之本然。  
豈足徵乎。韓必鼎反琤音捧珣音詢  
玕云吁反其音其衡音橫

述曰。說文云。踰。越也。今轉注之。釋文引馬云。越玉。越地所  
獻之玉也。然越非產玉。周書王會篇。無言南方之獻玉者。

僞傳云。於東西序坐北。列玉五重。又陳所寶。蓋傳釋越爲於。以大璧琬琰爲二重。以大玉夷玉天球爲三重。非也。夫寶陳序北。則西序東嚮者。豈大訓亦旁睨而不嚮之乎。琬琰固二重。則六而非五矣。易觀彖傳云。大觀在上。今陳寶者象焉。書疏引鄭云。赤刀。武王誅紂時刀。今無以見其必然也。詩公劉毛傳云。容刀。言有武事也。蓋武事之容也。疏云。鞞者刀鞘之名。琕者鞞之上飾。此所以爲容也。周官天府疏引鄭云。大訓者先王德教。虞書典謨是也。今不出之者。以未顧上文而言也。書疏引鄭云。大璧大琬大琰皆度尺二寸者。鄭以琬琰蒙宏之文也。攷工記云。大琮十有二寸。此宗后所守之度也。鄭以推王之大璧爾。攷工記云。琬



圭九寸而縹。以象德。琬圭九寸判規。以除慝。以易行。此王使所執之瑞也。鄭以推王之琬琰爾。攷工記云。璧羨度。尺好。三寸。以爲度。注云。好。璧孔也。爾雅曰。肉倍好。謂之璧。又典瑞注云。羨。長也。書疏引鄭云。大玉。華山之球也。今攷釋地云。西南之美者。有華山之金石焉。則石也。非球也。釋文引馬云。夷玉。東夷之玉也。鄭義見書疏。鄭繇馬而實之也。釋地云。東方之美者。有醫無閭之珣玕琪焉。今言東北者。周官職方氏云。東北曰幽州。其山鎮曰醫無閭。是也。說文云。醫無閭之珣玕琪。周書所謂夷玉也。蓋鄭與之同。僞傳云。夷。常也。蓋以夷通彝。然常玉。則何寶之乎。書疏引鄭云。天球。雍州所貢之玉。色如天者。又鄭於大玉三者云。皆璞。

未琢治。故不以禮器名之。今攷大玉。夷玉。殆然矣。若夫名之曰球。雖未琢治。固禮器也。球貴其聲。不以色貴也。釋文引馬云。球。玉磬。此蔡義之所繇也。引易者。繫辭傳文。引禮者。禮運文。注云。馬圖。龍馬負圖而出也。或曰。周官廋人云。馬八尺以上爲龍。其出於河者。猶漢武時。天馬出於渥洼水中也。僞傳云。伏羲王天下。龍馬出河。遂則其文以畫八卦。謂之河圖。傳以爲河圖卽八卦也。論語孔注云。河圖八卦是也。此與書疏引王肅顧命注同。或曰。論語孔注亦僞孔爲之爾。今攷漢志云。劉歆以爲處義氏繼天而王。受河圖。則而畫之。八卦是也。此豈以爲河圖卽八卦乎。處與伏通。史記云。大戎殺幽王驪山下。盡取周賂而去。胡氏渭据

之謂河圖亡於其時也。殆然矣。故自漢世無傳河圖者。迨於宋世。華山道士陳搏傳河圖於种放諸人。莫知其所繇始也。其圖爲白黑點者五十有五焉。易之象。實者陽也。今白而虛之。虛者陰也。今黑而實之。失其象矣。後漢書張衡傳注引易緯乾鑿度云。太一取其數以行九宮。蓋四正四維皆通乎中央也。鄭易注言大衍及四象者皆以生成之數言之。鄭乾鑿度注云。易有四象。文王用焉。布六于北方以象水。布七于南方以象火。布八于東方以象木。布九于西方以象金。四營而成易。由是而生四六四七四八四九之數。此鄭以緯傳經而爲之說爾。雖然。緯固不以九宮爲河圖也。鄭易注云。春秋緯曰。河龍圖發。洛龜書成。河圖有

九篇。洛書有六篇。然則與搏所傳者異矣。蓋搏推九宮而爲河圖也。且通其說於洛書焉。而申之者。以爲是圖也。吾儒失之。流於彼家。斯未察歟。朱子采之。蔡傳從之。蓋喜其數之實。通乎大衍也。而忘其圖之名。襲乎河圖也。雖然。辨其名而觀其實。蓋數之五位存焉。胡氏辨之。而以爲數之五位。卽天地之數。五奇五偶云爾。是言其數。而失其數之位也。則過矣。互詳鴻範疏。山海經云。伏羲氏得河圖。夏后因之。曰連山。黃帝氏得河圖。商人因之。曰歸藏。列山氏得河圖。周人因之。曰周易。蓋不惟以伏羲言也。伏羲者。包犧也。以聲轉而異焉。周官天府疏引鄭云。河圖。圖出於河。帝王聖者之所受。鄭亦不惟以伏羲言也。江氏云。河圖。文王

所受者。墨子曰。天命周文王。伐殷有國。泰顛來賓。河出綠圖。是也。周受命所自。故寶之。今不從者。山海經多誕。讖緯喜言河圖。其亦斯誕也。而鄭惑焉。墨子之言。孟子所謂好事者爲之也。此其誕之所從來遠矣。禮運疏引中候握河紀云。堯時受河圖。龍銜赤文綠色。此書緯也。廣博物志引尸子云。禹理鴻水。觀於河。見白面長人。魚身。出曰。吾河精也。授禹河圖。而還於淵中。尸子之言。猶墨子也。宋書符瑞志云。周公攝政七年。與成王觀於河。沈璧禮畢。榮光竝出。青龍臨壇。銜元甲之圖。坐之而去。宋志之言。猶書緯也。若夫晉志。則言黃帝創受河圖矣。論語讖。則言五老告舜河圖矣。其誕又班班若斯也。繇今攷之。天命之始。將開斯文。

馬圖之象。所謂觀鳥獸之文也。易固著其爲包犧氏也。所謂聖人則之者。此也。謂文王周公受河圖。將言其則之作易矣。黃帝舜禹受河圖。何無所則而作乎。謂劉歆稱河圖洛書相爲經緯。將言禹之鴻範亦河圖之則也。則箕子言大錫禹鴻範。何不遂言其錫河圖乎。禹於河圖無所則而作也。天何爲而錫之乎。論語云。鳳鳥不至。河不出圖。吾已矣夫。此猶檀弓稱孔子言明王不作。而天下莫能宗予也。其言猶詩之比興。蓋傷時者難言之也。非謂古者屢致河圖。今必思其又致也。漢書儒林傳。謂歎已不逢明君。是也。董子謂自悲可致此物。而身卑賤不得致也。則以辭害意矣。孔子得位。將必致河圖乎。虞書云。鳳皇來儀。召公之詩。

云鳳皇鳴矣。是其再至也。非先期之也。周公謂召公云。我則鳴鳥不聞。於旣聞者。懼其去也。非先期之也。論語云。苟有用我者。期月而已可也。三年有成。未聞自決其所致何祥也。且鳳鳥再至。召公歌之。周公言之。河圖數出。何易不言其數出也。然河圖之出。若易若書。若論語。皆言之矣。歐陽氏猶不信焉。其亦以世言河圖之多誣也。而欲絕之乎。其弊也。則疑經。然以信經故。而遂信諸子百氏之書。其弊也。則亂經。慎哉。閻氏云。朱子表章四書。有龍駒出於九峯山下。龍首馬身。若負河圖者。父老來賀。以爲與麟至同符。閻氏蓋謂不必伏羲而然矣。顧其言龍駒不虛也。其言若負河圖者。則形容之辭爾。豈河圖云乎。文選典引注稱蔡

邕云。尚書曰。顓頊。河圖。洛書。在東序。蓋蔡邕從今文也。顓頊者。以大玉。夷玉。天球之殘文而譌也。如以爲顓頊氏河圖。則洛書何以不繫焉也。或曰。顓頊者。丹書也。今攷大戴禮云。武王踐阼之日。召師尚父而問焉。曰。黃帝顓頊之道存乎。曰。在丹書。又云。師尚父西面道書之言曰。敬勝怠者。彊。怠勝敬者。亡。義勝欲者。從。欲勝義者。凶。繇是言之。是顓頊之書名丹書也。非以顓頊名書也。俞氏琰云。天球玉也。河圖與天球並列。蓋玉之有文者。非也。胡氏云。赤刀。金也。大訓與赤刀並列。亦將爲金之有文者乎。或曰。文德武功。旣皆貴之矣。而又正中而上文下武。何也。蓋皆貴之而不能無上下也。以武功統於文德之中也。古者文武不分途。



一人而兼將相之用。詩六月云。文武吉甫。萬邦爲憲。何其美乎。詩泂水云。矯矯虎臣。在泂獻馘。其美固若斯也。迄於春秋之世。猶不失其美焉。故武功之事。所以使文德之行。詩江漢云。矢其文德。洽此四國。此言召虎武功而終及之也。以武功統於文德之中也。故皆貴之而不能無上下也。詩小戎云。言念君子。溫其如玉。蓋雖秦風之言武功也。不猶以文德言乎。其後秦設武功爵。則異乎古之秦風矣。明太祖以武功得天下者也。而尊孔子文德。罷武成廟。大公之祀。則曰。大公鷹揚而授丹書。蓋太祖辯乎武功統於文德之中也。卽辯乎皆貴之而不能無上下也。書疏引鄭云。陳寶者。方有大事。以華國也。今不出之者。楊氏之義。於義

尤悉也。

允之舞衣大貝。鼗鼓在西房。兌之戈。和之弓。垂之竹矢。在東房。  
鼗音墳。兌徒外反。

此陳寶而無越玉五重者也。鄭氏謂允也。兌也和也。垂也。皆古人造此物者之名。蔡氏謂皆巧工。中濫度是也。垂。舜共工也。舞衣謂樂舞之衣也。大貝。文貝之大者。紂囚文王時。以之獻紂。殷亡。復歸於周焉。鄭氏稱大傳曰。散宜生之江淮之浦。取大貝如車渠是也。大鼓謂之鼗。房者路寢之北。其東西房連中室者也。房當東西夾之北。房之南戶嚮東西序焉。聘禮記曰。自西階升。遂曰。負右房而立。此可推也。今陳寶在房。則輝映乎東西序矣。經自西房而東房者。

以王殯在西階之上也。舞衣樂之容。大貝禮之飾。鼗鼓樂之節。賁文德也。其在西房陳之者。西方物之所成。禮樂以成德爲美也。舞衣鼗鼓皆樂用焉。今不相次而陳大貝於中者。樂之和分禮之中而爲之。且以禮飾而免於難。示子孫以憂患之不可忘。故正其中也。戈兵之近。弓矢兵之遠。賁武功也。其在東房陳之者。東方物之所生。兵以生道殺民也。戈及弓矢皆遞陳。不正其中者。兵宜遠近交資。且臣位不正其中。而物勒工名。弓有和之名。和雖異代之臣。亦同臣禮。故不正其中也。大貝如車渠。宜大觀矣。舞衣則櫛枷。鼗鼓則或足。或楹。或縣。戈則秘鑄。弓則虎韞。矢則魚服。今經不言者。以省文而可知也。蓋皆無越玉五重者也。○

謹案陳寶之日。喪事嚴矣。而有司之命。一物之陳。皆有精  
意存焉。召公元老。其治事之才何如也。而紀其事者。史文  
之達。使百世下如得之目前。亦何如其懿哉。中藏之中去聲難去聲掩

音移柳音架縣古懸字秘音祕簿在困反襲音密

述曰。僞傳云。允國所爲舞衣。蓋僞古文允征者。允謂國名也。繇傳言之。是史之爲文。國名人名不一例也。於文未適也。禮記明堂位。於國名云。崇鼎越棘。於人名云。垂之和鐘。彼妄記者。猶別其文矣。豈古史反不逮之乎。鄭義見周官天府疏。大傳云。西伯既伐耆。紂囚之羈里。散宜生遂之犬戎。取美馬。駁身朱鬣。雞曰之西海之濱。取白狐。青翰之於陵氏。取怪獸。尾倍其身。名曰騶虞。之有參氏。取美女之江

淮之浦。取大貝。大如車渠。陳於紂之庭。紂出見之。還而觀之。曰。此何人也。散宜生遂趨而進。曰。吾西蕃之臣昌之使者。紂曰。非子罪也。崇侯也。遂遣西伯伐崇。此文王之免於難也。攷工記云。車人爲車。軻長三尺。渠三軻者。三注云。渠二丈七尺。謂罔也。其徑九尺。鄭司農云。渠謂車輶。所謂牙是也。大鼓。謂之鼗。釋樂文。鼗與賁通。詩所謂賁鼓也。周官天府疏引鄭云。此鼗。非攷工記鼗鼓長八尺者。若周物。何須獨寶。鄭亦意言之爾。夫周物之美。固其寶也。曲禮云。大夫士出入君門。由闕右。蓋不正其中也。論語云。立不中門。蓋臣禮類然也。月令云。命工師效功。毋或作爲淫巧。以蕩上心。必功致爲上。物勒工名。以考其誠。蓋古之制也。曲禮

云。不同。槐。柳。注云。槐可以柳衣者。明堂位云。夏后氏之鼓足。殷楹鼓。周縣鼓。注云。足謂四足也。楹謂之柱。貫中上出也。縣縣之簣虞也。戈秘詳牧誓疏。曲禮云。進戈者前其鐃。注云。銳底曰鐃。詩小戎云。虎韞鏤膺。交韞二弓。毛傳云。虎虎皮也。韞弓室也。詩采薇云。象弭魚服。毛傳云。魚服魚皮也。鄭箋云。服矢服也。詩采芑云。方叔元老。毛傳云。元大也。今召公元老。非十亂之班乎。故以治事之才稱也。易小畜象傳云。君子以懿文德。釋詁云。懿美也。蓋史文美矣。其敘而可圖者。今以圖附顧命後焉。

大輅在賓階面。綴輅在阼階面。先輅在左塾之前。次輅在右塾之前。

輅音路  
阼音酢

輅。周官注引作路。綴謂聯綴也。猶漢書言屬車在後也。先謂先導也。次猶攷工記相次之次。周官巾車之職曰。王之五路。玉路以祀。金路以賓。同姓以封。象路以朝。異姓以封。革路以卽戎。以封四衛。木路以田。以封蕃國。蓋玉路以祀。不以封。明其大也。繇是以降。則殺之。玉路之行。殺者屬而相次。尤殺者遠而先導。蔡氏謂王乘玉路。綴之者。金路也。故金路謂之綴輅。遠者。木路也。故木路謂之先輅。以木路爲先輅。則象路革路爲次輅矣。是也。蓋五路之禮。革路禮之武車也。其餘皆禮之德車也。獨以德車之象路相次者。象路以朝。革路以卽戎。孟子曰。三不朝。則六師移之。蓋諸侯不朝。斯王不以朝。而以卽戎矣。此象路與革路所以相

次也。猶陳寶明文德武功之義也。賓階西階也。阼階東階也。門側之堂謂之塾。今言路寢門內也。面南面也。以門內北面言之。則左西而右東焉。經於階不言前。而以面言之。於塾不言東西。而以左右言之。明北面與南面車轅相面也。自西而東者。敬王殯也。先輅與大輅相面。明導大輅之先也。明綴輅次輅皆從大輅之後也。次輅與綴輅相面。明次輅亦以次而綴之也。周官典路之職曰。掌王之五路。若有大祭祀則出路。大喪大賓客亦如之。蔡氏謂大喪出輅禮也。殺音曠屬音燭

述曰。輅作路者。周官典路注所引文也。漢書賈捐之傳云。文帝詔曰。鸞旂在前。屬車在後。蓋車行而於後屬之也。攷



工記云。青與白相次也。赤與黑相次也。以相反者爲相次。今德車與武車亦相反也。曲禮云。武車綏旌。德車結旌。疏云。謂玉金象木四路不用兵。故曰德車。其義也。周官巾車云。玉路樊纓十有再就。大戴禮朝事篇同。禮器郊特牲言大路繁纓一就者。蓋所聞異也。繁與樊通。巾車注云。樊讀如聲帶之聲。今馬大帶也。纓。今馬鞅。樊纓皆以五采屬飾之。十二就。就。成也。巾車云。金路九就。象路七就。革路五就。而木路不言就焉。蓋降殺以兩。木路三就不言可知也。郊特牲云。先路三就。是也。巾車注。謂木路飾與革路同。非也。禮器云。次路繁纓七就。郊特牲云。次路五就。合之則與巾車言象革者同。而次路之相次昭然矣。綴典路注引作贅。

書疏典路疏引鄭云。大路玉路。贅路。次在玉路後。謂玉路之貳也。先路象路。門側之堂。謂之塾。謂在路門內之西北面。與玉路相對也。次路象路之貳。與玉路之貳相對。在門內之東北面。贅。次是從後之言。二者皆爲副貳之車。不陳金路革路木路者。主於朝祀而已。孫氏謂五路之貳。巾車無文。大戴禮朝事篇云。天子乘大路。貳車十有二乘。是大路有貳也。朝於五禮屬賓。則金路以賓。亦宜陳之。今不陳者。蓋喪中受朝。不迎賓。無所用金路也。此申鄭而言之也。今以周官攷之。道僕於象路云。掌貳車。戎僕於戎車云。掌倅車。田僕於田路云。掌佐車。倅與佐。皆貳也。而皆非典路掌之。然則出路不出其貳也。出路者。事死如事生。爲成王

也。非爲康王也。安有以喪不迎賓而不陳者乎。周官車僕云。掌戎路之萃。廣車之萃。闕車之萃。萃車之萃。輕車之萃。凡師共革車。各以其萃。又云。大喪。厥革車。注云。萃。猶副也。言興革車。則遣車不徒戎路。廣闕萃輕皆有焉。疏云。王喪遣車九乘。此五乘之外。加以玉金象木四者。則九乘矣。繇是言之。五路皆出。遣車且然。則顧命可推也。萃者倅也。皆貳也。鄭釋厥爲興。從釋詁義也。車僕言大喪所興者。亦不言各以其萃也。故典路言出路者。統五路而言。未嘗析言其所出也。僞傳云。大輅玉。綴輅金。先輅象。次輅木。蓋傳不言革也。書疏引馬王者。皆云。兵事非常。故不陳之也。皆於義未悉也。禮檀弓云。周人殯於西階之上。則猶賓之也。其

上文云。夏后氏殯於東階之上。則猶在阼也。其曰阼者。士冠禮注云。東階所以答酢賓客也。門側之掌。謂之塾。釋宮文。白虎通云。所以必有塾何。欲以飾門。因取其名也。明臣下當見於君。必先熟思其事也。

二人雀弁執惠。立于畢門之內。四人綦弁執戈上刃。夾兩階。一人冕執劉。立于東堂。一人冕執鉞。立于西堂。一人冕執戣。立于東垂。一人冕執瞿。立于西垂。一人冕執銳。立于側階。弁音辨。綦音其。刃音認。凡音祀。戣音達。瞿羣虞反。銳以稅反。

此方傳顧命而兵衛之度也。弁士服。雀弁者。鄭氏謂赤黑曰雀。言如爵頭色也。惠。兵器。或曰惠。順也。蓋兵宜順入者。鄭氏謂蓋斜刃也。畢門。路寢門。王朝五門。畢於是門也。綦。

亦作騏。蓋古通也。鄭氏謂青黑曰騏。詩曰。我馬維騏。戈戟也。上刃者。執而樹其刃也。牧誓曰。王左杖黃鉞。又曰。稱爾戈。立爾矛。皆上刃也。凡人衆之會。執兵者。必上刃而後可行。且無以刃嚮人之嫌。獨於執戈言之者。舉一以例其餘也。故史於此又獨不言立焉。明其皆互文也。彤砌也。立而夾賓階之砌者二人。阼階亦同。故四人也。冕大夫服。剡兵器。或曰。剡。殺也。蓋兵宜斬殺者。鄭氏謂蓋今鑊斧也。鉞。大斧也。東西之堂。謂夾室之前。蓋東西廂也。鄭氏謂序內半以前曰堂。是也。殳。殳。皆兵器。或曰。殳。文從癸。篆文。癸。象水四入形。蓋兵有四鋒。象癸之形者。韓詩外傳。謂物旁出曰瞿。絲是推之。蓋兵有鋒旁出者。鄭氏謂瞿。蓋今三鋒矛也。

垂者東西序前之堂廉也。銳兵器。或曰銳芒也。蓋兵得兌金之芒者。鄭氏謂矛屬也。側階北堂之階也。蓋西房北墉而已。東房中半以北曰北堂。有北階以其側於東。故曰側階。此達於燕寢者。嚴內外之防。故以大夫主之也。經於立皆不言面者。察視非常。面無定也。自東而西者。敬王生時之正位也。自牖閒南嚮而言。以執兵者不皆近殯也。○謹案呂氏曰。古者執戈戟以宿衛王宮。皆士大夫之職。無事而燕私。則從容養德。有事而禦侮。則堅守腹心。下及秦漢。陛楯執戟。尙餘一二焉。此制旣廢。人主接士大夫者。僅視朝數刻。而周廬陛楯。或環以椎埋鬻悍之徒。繇是言之。古制豈不當采邪。夫方傳顧命。其兵衛若斯矣。則居恆之兵。

衛可知也。

錢士衡反從音懸。陸傍禮反。攝音屑。

述曰。士冠禮云。爵弁服。雜記云。士弁而祭於公。則弁者。士服也。鄭義見書疏。其下。自騏義外。所引鄭同。白虎通云。周之冠色。所以爵何。爲周尙赤。所以不純赤。但如爵頭何。以本制冠者。灋天。天色元者。不失其質。是也。惠順釋言。文明堂位注云。天子五門。皋庫雉。應路。是也。路門畫虎。亦曰虎門。鄭騏義。見詩鵲鳩及駟疏。釋文云。綦馬本作騏。謂青黑色也。蓋鄭與馬同。說文云。騏馬青驥。文如博綦也。綦帛蒼艾色也。段氏云。綦。綦。古今字。是也。詩出其東門。傳云。綦巾。蒼艾色。其例也。戈。錢。詳牧誓篇。廣雅云。彤砌也。僞傳云。堂廉曰彤。非也。張衡西京賦云。金彤玉階。蓋彤以階言。不以

堂言也。經固言兩階阼也。說文云。阼古文阼。蓋砌象人之兩頤也。周官司服云。大夫之服。自元冕而下。則冕者。大夫服也。士冠禮疏云。冕者。俛也。低前一寸二分。故得冕稱。雀弁則無前低後高之制。是也。劉毅釋詁文。釋宮云。室有東西廂曰廟。郭注云。夾室前堂。其義也。癸案文作𡩺。說文云。象水从四方流入地中之形。蓋幾亦象形也。書疏引鄭云。幾。瞿蓋今三鋒矛也。鄭釋幾者。殆非也。經幾瞿別文。豈其同乎。韓詩外傳云。直曰車前。瞿曰茅苙。蓋生於兩旁。謂之瞿。古與衢通。楚辭云。靡萍九衢。其例也。或曰。說文云。瞿。鷹隼之視也。蓋鷹將擊鳥。必先視之。用武者象焉。故詩曰。時維鷹揚。蓋瞿者。兵可鷹視擊之者也。釋詁邊垂義同。鄉飲



酒禮云。設席於堂廉。注云。側邊曰廉。是也。蔡傳引說文云。銳。侍臣所執兵也。从金。允聲。周書曰。一人冕執銳。讀若允。蔡傳据之。謂銳當作銳。非也。釋文云。銳。以稅反。不言說文作銳。蔡所据者。非古善本說文也。段氏云。玉篇無銳字。蓋玉篇所据尙書作銳也。廣韻十七準無銳字。十四泰曰。銳。矛也。蓋所据與玉篇同。毛氏六經正誤曰。銳。矛屬。說文音兌。廣韻徒外切。今音以稅反。是銳利之銳。非兵器也。當從說文音。蓋毛氏所据說文作銳也。繇是言之。說文作銳。讀若兌。此古善本也。說文又云。銳。芒也。此後人以銳譌銳。遂移分之爾。經原作銳。或疑衛包改之。誤矣。段說是也。成二年左傳云。銳司徒免乎。杜注云。銳司徒。主銳兵者。漢書高

倍於衣之例。麻冕亦不過十五升。蓋今尺一分。容九縷焉。已難成矣。姚氏云。麻冕何服也。曰。緇衣十五升服也。禮言冠而不言服。則服如其冠矣。是元端服也。釋詁云。躋升也。躋與躋通。詩蝮蝮毛傳云。躋升也。曲禮云。居喪之禮。升降不由阼階。注云。常若親存也。坊記云。升自客階。弔於賓位。教民追孝也。注云。謂反哭時也。既葬矣。猶不由阼階。不忍卽父位也。則今之既殯可知也。顧氏炎武云。顧命中有脫簡焉。狄設黼展綴衣以下。當屬之康王之誥矣。自此以上。記成王顧命登遐之事也。自此以下。記明年正月上日康王卽位朝諸侯之事也。記曰。未沒喪不稱君。而今日王麻冕黼裳。是踰年之君也。今攷顧氏言脫簡者。非也。先王顧

命。蓋傳重之大者也。既殯則當傳之矣。踰年而後傳之。非所以重先王之命也。春秋昭公二十有二年夏四月乙丑。天王崩。六月。叔鞅如京師。葬景王。王室亂。劉子單子以王猛居于皇秋。劉子單子以王猛入于王城。冬十月。王子猛卒。蓋猛者未踰年之君也。宜書曰子。春秋稱子猛曰王。明其宜爲王者也。今顧命稱子釗曰王。亦明其宜爲王者也。故下文云。王義嗣德。此立政所謂嗣天子王也。蘇氏云。三年之喪。旣成服。釋之而卽吉。無時而可者。孔子曰。將冠子未及期日。而有齊衰大功之喪。則因喪服而冠。冠吉禮也。猶可以喪服行之。受顧命獨不可以喪服乎。此據禮曾子問言冠禮者言之也。蓋以此吉服爲非禮也。蔡傳從焉。然

據冠禮以言此經。非其例也。漢志云。伊訓篇曰。惟大甲元年。十有二月乙丑朔。伊尹祀于先王。誕賚有牧。方明言雖有服。以冬至越第祀先王于方明。以配上帝。蓋猶王制之義也。第與紼通。王制注云。紼。輶車索。疏云。未葬之前。屬第於輶。以備火災。是也。蓋越第者。既殯而祭之也。曾子問云。天子嘗禘郊社五祀之祭。簠簋既陳。天子崩。后之喪。如之何。孔子曰。廢。又云。天子崩。未殯。五祀之祭不行。既殯而祭。繇是推之。蓋郊社之祭。廢於初喪。而行於既殯也。禮郊特牲云。祭之日。喪者不哭。不敢凶服。此言郊道之民也。而況於親郊者乎。曾子問云。君薨。而世子生。如之何。孔子曰。卿大夫士從攝主。北面於西階南。大祝裨冕。執束帛。升自西

階盡等不升堂。命毋哭。祝聲三。告曰。某之子生。敢告。注云。攝主上卿代君聽國政。裨冕者。接神則祭服也。檀弓云。弁絰葛而葬。與神交之道也。有敬心焉。注云。接神之道。不可以純凶。天子諸侯變服而葬。亦其義也。朱子語類言。顧命者。嘗言此於禮爲非矣。然朱子答潘時舉之問也。又言天子諸侯之禮。與士庶人不同。故孟子未之學。蓋謂此類爾。漢唐新主卽位。皆行冊禮。君臣吉服。述先帝之命以告嗣王。蓋易世傳授國之大事。當嚴其禮。而王侯以國爲家。雖先君之喪。猶以爲己私服也。五代以來。此禮不講。則始終之際。殊草草矣。卿士。詳鴻範篇。鄭蟻義。見太平御覽。夏小正傳云。元駒也。蒼蟻也。中庭之左右。謂之位。釋宮文。鄭卽

位義見書疏。蔡傳云。不言升階者。從王賓階也。非也。位在中庭。豈升階乎。

大保。大史。大宗。皆麻冕彤裳。大保承介圭。上宗奉同瑄。由阼階。隋。大史秉書。由賓階。御王冊命。大音太奉音捧瑄音言御如字

此方傳顧命而進冊之度也。蔡氏曰。大宗。宗伯也。彤。纁也。大保受遺。大史奉冊。大宗相禮。故皆祭服。是也。承。薦也。介圭。言承。同瑄。言奉。蓋奉而薦之。互文也。介。大也。圭。大尺二寸。謂之玠。鄭氏曰。上宗。猶大宗。變其文者。大宗伯一人。與小宗伯二人。凡三人。使其上二人也。一人奉同。一人奉瑄。是也。同。祭酒器。馬氏以爲同者。大同天下也。瑄。玉器。言天子之德。覆冒天下也。攷工記曰。天子執冒四寸。以朝諸侯。

大保。大宗奉而薦先王之重器於嗣王。蔡氏謂其有主道焉。故升自阼階。是也。書者所書顧命之冊也。御進也。言大史進王以冊命之書也。書稱冊命。則進讀可知也。鄭氏曰。王此時正立賓階上。少東。大史東面於殯西南而讀冊書。以命王嗣位之事。相去聲 玠音介

述曰。攷工記云。三入爲纁。釋器云。一染謂之緇。再染謂之窺。三染謂之纁。窺與緇通。郭注云。淺赤也。則纁者。三入之赤也。詩靜女箋云。彤管筆赤管也。蓋彤者纁也。周官司服注云。凡冕服皆元衣纁裳。疏云。易言衣裳蓋取諸乾坤。天色元。地色黃。土無正位。託於南方火。赤色。赤與黃是纁也。說文云。承奉也。以言此經。則複矣。聘禮記言執圭云。授如

爭承。此奉執不足盡承之義也。昭十二年左傳云。奉承齊犧。則奉而薦之也。皋陶謨言承之者。亦薦之之意也。介大。釋詁文。圭大尺二寸。謂之玠。釋器文。詩崧高云。錫爾介圭。釋器注引詩介作玠。蓋古通也。攷工記云。鎮圭尺有二寸。天子守之。蓋介圭也。鄭上宗義見書疏。蓋据周官之序官言之也。吳志注言虞翻奏云。鄭解顧命。康王執瑄。古瑄字似同。從誤作同。既不覺定。復訓爲栝。又馬融注亦以爲同者。大同天下。今經益金作銅。言天子副璽。雖皆不得。猶愈於元。此言鄭失也。孫氏云。虞以同爲同。非也。經下文言王受同者。則云三宿三祭三咤。又云大保受同。是同爲酒器。故大保可受焉。則不可謂之同也。江氏云。同圭瓚也。以挹



鬯裸祭者。祭統云。君執圭瓚裸尸。大宗執璋瓚亞裸。是其差也。經下文言大保者。則云。以異同秉璋以酢。蓋彼同爲璋瓚也。則此同爲圭瓚矣。此江氏之申鄭也。經下文云。乃受同瑁。白虎通引同作銅。蓋今文也。虞之所謂今經也。孫氏云。銅亦酒器也。以所飾之金而名也。白虎通云。圭瓚。瓚。玉飾其本。金飾其中。君子有黃中通理之道。其義也。或曰。古本惟作同。鄭本惟作同。非同同。二文兼也。非也。經下文云。乃受同瑁。書疏引鄭云。王旣對神。則一手受同。一手受瑁。是鄭本二文兼也。僞傳云。同。爵名。從說文義也。今言祭酒器者。上下經文。据以言之。而不質言也。馬義蓋名同之所繇也。虞謂其不得。非也。其於瑁以冒名。一例也。冒義。

詳堯典班瑞疏。蔡傳引蘇氏云。凡王所臨所服用皆曰御。此以御王爲王御。非也。詩六月毛傳云。御進也。鄭冊命義見書疏。又鄭云。御猶嚮也。蓋以御通返。言迎而嚮之也。然詩傳之訓於文尤洽也。禮少儀云。詔辭自右。則大史東面可知也。王正立者。謂北面立也。禮曾子問言君薨而世子生者。則云三日。少師奉子以衰。子升自西階。殯前北面。其例也。南史沈文阿傳云。千人無君。不敗則亂。成王在喪。禍幾覆國。是以始殯受冊。蓋示天下以有主是也。

曰。皇后憑玉几。道揚末命。命汝嗣訓。臨君周邦。率循大卞。燮和天下。用答揚文武之光訓。

下音弁燮  
息協反

此大史傳顧命而陳告之度也。蔡氏曰。成王顧命之言。書

之冊矣。此大史口陳者是也。蓋太史讀冊書後而陳告焉。皇后大君也。道言。揚續末終也。謂道言以揚續其末終之命。卽顧命也。曰汝者。蔡氏謂父前子名之義是也。大史稱曰汝而無嫌者。古人固汝其君也。若皋陶謨洛誥有然也。況其臨之以先王之冊命也。不曰嗣位而曰嗣訓者。呂氏謂訓所以守位也。臨君者居上臨下而君之也。易曰。知臨大君之宜。大卞者。王氏謂大灋也。率亦循也。絜亦和也。皆重文答對也。蓋能答對之。然後能揚續之也。猶詩所謂對揚王休也。大史言曰。大君先王力疾憑玉几。道言以揚續其末終之命。命汝嗣守文武大訓。有臨而君周邦。必率循訓中之大灋。庶柔和乎天下。以對揚文武之重光大訓焉。

知音  
智

述曰。釋詁云。皇大也。后君也。孝經云。非先王之灋言不敢道。則道者言也。揚續。釋詁文。互詳洛誥疏。末終。詳召誥疏。易未濟彖傳云。不續終也。曲禮云。父前子名。今以汝爲稱。自父子言之也。臨君周邦。文選責躬詩注。引作君臨周邦。以易義通之。則臨君是也。引易者。臨六五文。中庸云。唯天下至聖。爲能聰明睿知。足以有臨也。僞傳以大卞爲大灋。書疏謂王肅亦同。蓋傳襲王爲之也。卞者。弁省文也。詩小弁。漢書作小卞。其例也。士冠禮記云。周弁。殷冏。夏收。注云。弁名出於槃。槃大也。言所以自光大也。繇是言之。弁者。周之灋服也。此大卞所以爲大灋也。釋詁云。率。循也。詩假樂

云。率由舊章。循撫之謂也。釋詁云。攸和也。鴻範云。攸友柔克。柔和之謂也。引詩者。江漢文。鄭箋云。對答也。詩皇矣云。以對于天下。鄭箋釋對者同。則答亦對也。詩江漢云。召公是似。毛傳云。似嗣也。詩良耜云。以似以續。續古之人。其義也。此明召虎於王命之休美。所以對答之者。卽所以揚續之也。鄭箋以稱揚言之。是矣。然稱揚者。豈不爲似續者乎。詩言其對答之。顧命言其答對之。蓋以轉注而然也。

王再拜興。答曰。眇眇予末小子。其能而亂四方。以敬忌天威。音眇貌

此王聞顧命而敬答之度也。眇眇。微也。禮。天子未除喪。曰予小子。蓋自初喪當然。今從而加末稱爾。亂治也。四方何

能而治之。惟自治者。則能而治四方矣。言王聞顧命而再拜。既起。乃答言曰。眇眇然予微末小子。其將能而治四方。以敬畏天威乎。蓋聞命敬之。自恐不能也。蔡氏曰。顧命言敬。迓天威。嗣守文武大訓。故大史所告。康王所答。皆於是致意焉。

述曰。眇眇微也。此文選幽通賦。曹大家注義也。引禮者。曲禮文。僞傳云。其能如父祖治四方。以敬忌天威乎。謙辭。託不能。蔡傳說同。詩都人士箋云。而亦如也。此僞傳之說所繇也。今攷於經。而者。轉語辭。於文尤洽也。先王之前。無所用其謙辭。此非託不能者也。

乃受同瑄。王三宿三祭三咤。上宗曰。饗。

咤丁故反音妬又音託

自此而下二節。既傳顧命而饗祭之度也。經言受同瑱。不言受介圭者。省文也。受同以宿祭。不獨言受同。而連言受瑱者。瑱與介圭皆玉。必言受瑱。而後受介圭可知也。宿與縮通。禮曰。縮酌用茅。縮者。沃酒茅上。留其滓而去之也。左傳曰。爾貢包茅不入。王祭不共。無以縮酒。今言三祭。則三宿者。縮酒也。祭謂祭成王。咤。謂奠其祭酒器也。皆言三者。禮成於三也。曰者。上宗告神之辭也。饗者。告神所饗其祭也。猶禮所謂祝饗也。滓壯土反。共音供。

述曰。白虎通云。王者既殯而卽繼體之位何。緣臣民之心。不可一日無君。故先君不可得見。則後君繼體矣。尙書曰。王再拜興對。乃受銅瑱。明爲繼體君也。此答作對。同作銅。

且引而節之焉。經上文云。大保承介圭。僞傳云。奉以奠康王所位。書疏云。不言受介圭者。以同瑱并在家中。故不得執之。大保必奠於其位。但文不見爾。是不然也。介圭重器。徒奠之而無授受。非禮也。夫受瑱不見所執之文。則王受而奠之矣。介圭當然也。凡稱宿者。謂留而去之也。留其滓而去之。則以茅宿酒也。宿古通縮。蓋古字多不加偏旁也。引禮者。郊特牲文。引左傳者。僖四年文。說文引傳。縮作舊。亦古通也。周官司尊彝云。醴齊縮酌。注云。醴齊濁。沛之以茅。縮去滓也。鄭司農云。故書齊爲盞。讀爲齊和之齊。釋文云。盞字今反。儀禮特牲饋食禮云。乃宿尸。注云。宿讀爲肅。釋詁云。肅進也。僞傳云。王三進爵。蓋破字釋之。非本文。



也。書疏引鄭云。徐行前曰肅。卻行曰咤。王徐行前三祭。又三卻復本位。此鄭破宿爲肅也。且鄭以咤文從宅。宅有居之義焉。遂反乎前進而爲之說爾。釋文云。咤陟嫁反。字亦作宅。又音妬。徐音託。說文作託。丁故反。奠爵也。馬本作詫。與說文音義同。今攷說文。託从一。託聲。引此經而說之。蓋從古文也。或曰。咤謂悲咤。猶禮言祝聲三也。然經言王非言祝也。當冊命而悲咤。可乎。儀禮士虞禮云。祝饗。注云。饗告神饗也。士虞記云。饗辭曰。哀子某。圭爲而哀薦之。饗。注云。饗辭勸彊尸之辭也。圭。絜也。繇是推之。初喪無尸。今上宗曰饗者。當以告神言也。蔡傳云。傳神命。以饗告。非也。僞傳云。祭必受福。讚王曰饗福酒。此傳据特牲少牢之禮推

之也。若所謂主人受嘏福者也。然禮之言嘏。不與饗異乎。經於大保飲福者。惟曰嘏焉而已。則王不飲福可知也。鄒氏季友云。吉祭戶祭酒。此非吉祭。不迎尸。故王代尸祭酒也。非也。此以酒祭成王也。豈祭酒邪。下文祭嘏之祭。則祭酒矣。蓋其時祭酒者在大保也。不在王焉。如鄒氏言。將此經無王祭成王者乎。非禮也。

大保受同。降。盥。以異。同秉璋以酢。授宗人同拜。王答拜。大保受同祭。嘏宅授宗人同拜。王答拜。酢才各反。嘏才衛反。

大保受同者。受異同於宗人也。故曰授宗人同。繼又曰大保受同。終又曰授宗人同。明宗人以同授大保也。經言異同。貫乎上下文之間。明大保受同。皆異同也。降者自堂而

降。蓋祭禮之盥。在階下也。盥者盥同。承上文而言。祭禮以盥洗致絜也。異同者。不敢用王之同也。半圭曰瑋。蔡氏曰。酢報祭也。祭禮。君執圭瓚裸尸。大宗執瑋瓚亞裸。報祭亦亞裸之類。故亦秉瑋是也。蓋大保受顧命。今既冊命於王。王祭之後。大保宜報祭焉。蓋報顧命也。宗人者。對大宗之稱。蓋上宗之小宗伯也。大宗則上宗之大宗伯。其時贊王禮矣。授宗人同者。將拜故也。拜者。以既冊命而拜王。重傳命也。王答拜者。皆重傳命也。經又言大保受同者。受嘏福之同也。祭者。祭酒也。祭禮飲酒。皆先祭之。若食之。祭于豆間。不忘本也。今以飲福而祭酒焉。嘏者。嘗酒至齒也。蔡氏謂大保在喪。飲神之賜。而不甘味也。若王則喪之主。非徒

不甘味。雖飲福亦廢也。宅居也。蔡氏謂大保退居其所以同授宗人也。拜者既事畢而拜王。重禮成也。王答拜者皆重禮成也。經言降不言升者。蓋此言秉璋以酢。下文又言大保降。則其升可知也。言祭嚌而宅。則酢而宅。拜而宅。又可知也。皆史之省文也。韻古雅反  
歆許金反

述曰。僞傳云。受王所饗同。下堂反於篚。蓋傳以爲王以同授大保也。今攷其時。無王所饗同。若禮所謂實爵於篚者。今經無其文也。蔡傳云。大保受王所咤之同。下堂盥洗。更用他同秉璋以酢。絲蔡言之。則同既玉所咤矣。大保何絲而受王所咤之同也。如受之。則經不言大保授王之同於何人。而遽言以異同乎。如謂此下言授宗人同者。卽王之

同則經言奉同瑱者上宗也。豈以王之同授宗人乎。且上下相牽於文未適也。蓋經於大保受同者再言之。固連文以明之也。蔡於此而分節焉。則未察之矣。儀禮少牢饋食禮云。設洗于阼階東南。又云。主人降洗爵。蓋降盥也。則大保可推也。僞傳云。大保以盥手洗異同。然上文言大保承介圭矣。豈至是乃盥手乎。半圭曰瑱。詩斯干毛傳文。周官典瑞云。裸圭有瓚。以肆先王。攷工記云。裸圭尺有二寸。大瑱中瑱九寸。邊瑱七寸。射四寸。厚寸。黃金勺。青金外。朱中。鼻寸。衡四寸。有纁。注云。射琰出者也。鼻勺流也。凡流皆爲龍口也。衡古文橫。假借字也。衡謂勺徑也。三瑱之勺形如圭瓚是也。蓋以圭爲柄也。纁與藻通。玉人注云。纁藉也。雜

記注云。藻藉玉者也。釋詁云。酢報也。蓋飲而報之者。謂之  
酢。祭而報之者。亦謂之酢也。易繫辭傳云。顯道神德行。是  
故可與酬酢。可與佑神矣。此筮者問而報之。猶以酢稱也。  
周官司尊彝之職。言以祭而獻者。尊皆有罍。皆云。諸臣之  
所昨也。注云。昨讀爲酢。諸臣獻者。酌罍以自酢。江氏以言  
此經非也。經言秉璋以酢。猶郊特牲所謂灌用圭璋也。蓋  
報祭也。諸臣之所酢。豈秉璋以酢乎。江氏謂酢者。既獻則  
自酢也。蓋以下言受同之祭爲祭獻也。則經何以未獻而  
先酢乎。引璋義者。禮祭統文。蔡傳云。以同授宗人而拜尸。  
王答拜者。代尸拜也。非也。將以爲承裸尸言之。則士虞禮  
有尸答拜之文。王何爲而代尸拜乎。且初喪無尸。檀弓所

以言虞而立尸也。將以爲死者之尸不能拜。故王代之。則成王既殯。豈禮所稱在牀曰尸乎。禮燕義云。君舉旅於賓。及君所賜爵。皆降。再拜稽首。升成拜。明臣禮也。君答拜之。禮無不答。明君上之禮也。而今之答拜可推矣。儀禮少牢饋食禮云。嘏于主人。注云。嘏。大也。予主人以大福。士虞禮言祝之受爵者。則云。取肺坐祭。嘑之。又云。祭酒。嘗之。其言饗尸者。則云。祭于豆。鬯皆祭。始爲酒食者也。僞傳云。大保既拜而祭。傳以爲至是始報祭也。則上言以酢者。何邪。蔡傳云。大保復受同以祭。蔡承報祭言之也。則王三祭而禮一成。大保報祭而禮再成。君一而臣二。非禮也。禮雜記云。小祥之祭。主人之酢也。嘑之。衆賓兄弟則皆啐之。注云。嘑。

啐皆嘗也。嘑至齒。啐至口。蓋嘑者且不啐也。金氏履祥云。大保攝飲福。非也。此非大保之攝祭也。周語云。王歆大牢。韋注云。歆饗也。宅居。釋言文。論語云。居吾語女。蓋宅之爲文。猶居之一言也。

大保降。收諸侯出廟門俟。

收者徹禮器也。大保旣降。則有司徹矣。大保不言出者。下文言大保入應門左。則其出可知也。廟門路寢門。所謂畢門也。變其文者。蔡氏謂成王之殯在焉。故曰廟是也。廟貌也。顧命陳設多文。皆所以貌鬼神也。史記以爲先王廟者。非也。禮曰。殷朝而殯於祖。周朝而遂葬。蓋祖者先王廟也。周不殯于廟。今諸侯奚于王旣殯而至廟乎。左傳曰。凡夫



人不殯于廟則弗致也。此非謂先王廟也。猶曰不殯于宮。爾服氏之釋傳曰。廟謂殯宮。鬼神所在謂之廟是也。禮曰。至于廟門不毀牆遂入。適所殯。蓋以所殯爲廟也。今此經亦然也。俟者。俟見王也。不言卿士者。蔡氏謂言諸侯則卿士可知也。此結上文以爲傳顧命之終。而起下文以爲將朝享之端。朝直遷反

述曰。儀禮少牢饋食篇。其下篇云。有司徹。謂禮畢而收徹也。大傳云。廟者貌也。引禮者。檀弓及雜記文。檀弓注云。朝謂遷柩於廟是也。引左傳者。僖八年文。杜氏云。將葬不以殯過廟。邵氏云。凡柩行而止。皆謂之殯。檀弓疏云。鄭以爲春秋變周之文。從殷之質。故殯於廟。此釋傳者皆非也。服

氏之義。檀弓疏所引服虔左傳注也。蓋善於經矣。僖三十  
二年左傳云。晉文公卒。殯于曲沃。鄭志答趙商問者。以爲  
去絳從祖殯。末世禮異。非也。傳言殯于曲沃。曷嘗言殯于  
祖乎。雜記注云。廟所殯宮。此言諸侯行而喪歸之禮也。儀  
禮士喪禮云。巫止于廟門外。注云。凡宮有鬼神曰廟。此廟  
卽士之殯宮在適寢者也。亦其義也。適與嫡通。史記云。二  
公率諸侯。以天子釁見於先王廟。蓋以牖閒南嚮而下。其  
陳設者。皆廟中也。今攷周官小宗伯云。建國之神位。右社  
稷。左宗廟。注云。庫門內。雉門外之左右。繇是推之。今諸侯  
之出廟門也。則二公率諸侯入雉門。而後入應門矣。經何  
以不言入雉門乎。然猶曰省文也。若夫王在廟中。經不言

王出廟門。又不言入應門。而遽曰王出在應門之內乎。史必無如是之省文也。以是知其非先王廟也。孫氏云。史遷言見於先王廟者。經云。逆子釗于南門之外。此廟門卽南門也。蓋欲申史記而失之也。夫經言南門。其上文無言廟者。何以知爲廟之南門也。且逆子釗者在己丑王崩後焉。出廟門者在癸酉冊命後焉。其書曰固不同也。顧氏云。記曰。周卒哭而耐。而今日。諸侯出廟門。俟。是已耐之後也。此疑其闕文者也。亦以爲先王廟而疑之爾。

王出在應門之內。大保率西方諸侯入應門左。畢公率東方諸侯入應門右。皆布乘黃朱。賓稱奉圭兼幣。曰。一二臣衛。敢執壤奠。皆再拜稽首。王義嗣德。答拜。應去聲。乘繩證反。奉音捧。壤如丈反。

此既受顧命而朝享也。蓋王未釋冕。諸侯朝享焉。以受先王命。嗣天子王。敬乎其繫天地社稷之重也。皆不敢囚服也。應門之內者。畢門之外也。治朝在焉。蓋王出而在治朝也。諸侯者。以時祭而至。適遭王喪者也。周官言諸侯者曰。春見曰朝。夏見曰宗。秋見曰覲。冬見曰遇。賈氏周官說曰。一方四分之。或朝春。或覲秋。或宗夏。或遇冬。藩屏之臣。不可虛方俱行。故分趣四時助祭也。繇是言之。則四時之祭。皆一時而四方諸侯有至焉。故王崩九日。而有西方東方諸侯也。二伯分東西而治。言東西則南北兼之矣。大保爲西伯。畢公爲東伯。各率其方之諸侯而入。蓋入則左西右東也。布陳也。四馬曰乘。黃朱黃馬朱鬣也。賓者王以諸侯

爲賓也。洛誥所以言王賓也。稱者賓釋辭而稱其所奉之兼禮也。圭命圭所以朝幣合幣所以享常禮朝而後享今以王喪而遽行鄭氏謂此朝兼享禮也與常禮不同是也。曰者賓釋辭所稱也。臣衛者諸侯爲王臣而藩衛也。言一二者衆也。敢者釋辭之謹也。壤猶禹貢咸則三壤之壤言敢執壤地所出者陳奠之謂庭實也。禮曰庭實唯國所有於再拜稽首言皆者明釋辭不皆也。鄭氏謂釋辭者一人其餘奠幣者再拜稽首而已是也。義宜也。王在喪未嗣位故以嗣德爲言。蔡氏謂此史氏之辭也。王宜嗣前人之德故答拜也。吳氏曰穆公使人弔公子重耳重耳稽顙而不拜。穆公曰夫稽顙而不拜則未爲後也。蓋爲後者拜也。弔

者舍者。禘者升堂致命。主孤拜稽顙。成爲後者也。康王之  
見諸侯。若以爲不當拜而不拜。則疑未爲後也。且純乎吉  
也。答拜。既正其爲後。且知其以喪見也。朝直遙反。屏賓傾  
反。趣七喻反。重平

聲夫音乎舍胡  
關反。禘音遂。

述曰。釋宮云。正門謂之應門。治朝。詳召誥位成。疏。顧氏云。  
傳言天子七月而葬。同軌畢至。而今召公率西方諸侯。畢  
公率東方諸侯。是七月之餘也。不然。七日之間。諸侯何繇  
而畢至乎。今攷經上文言七日癸酉者。自乙丑王崩言之。  
則九日也。經言率諸侯者。非言諸侯畢至也。如以爲畢至  
矣。則下文言侯甸男衛。而不言要服也。豈其畢至乎。蓋未  
察其以時祭而至者也。引周官者。大宗伯文。賈氏之義。詩

韓奕疏所引賈逵周官說也。互詳堯典四朝疏。藩與蕃通。廣韻云。趣向也。二伯分東西而治者。隱五年公羊傳自陝而言之者也。漢宏農郡。陝縣。今河南陝州也。樂記云。五成而分。周公左召公右。蓋記之左右。以南面言。今經之左右。以北面言也。書疏引王云。畢公代周公爲東伯。蓋其時周公旣沒矣。昭二十六年左傳言幣錦云。百兩一布。杜注云。布陳之。今馬乘亦然也。詩叔于田云。乘乘黃。毛傳云。四馬皆黃。蓋一車四馬也。今喪之朝禮。與覲禮言九馬者不同。詩干旄疏。引鄭駁異義云。顧命諸侯皆布乘黃朱。言獻四黃馬朱鬣也。今攷定十年左傳云。宋公子地有白馬四。公取而朱其尾鬣。蓋馬之鬣貴朱也。白虎通云。書曰。黼黻衣。

黃朱紼。蓋異文也。武氏億云。竊古通攢。賓稱是攢者之辭。非也。如其說。則稱曰一二臣衛何邪。鄭義見書疏。下引鄭同。又鄭云。此幣圭以馬。蓋舉王者之後以言爾。諸侯當璧以帛。亦有庭寶。鄭之釋圭。非也。周官云。小行人合六幣。圭以馬。璋以皮。璧以帛。琮以錦。琥以繡。璜以黼。注云。六幣所以享也。五等諸侯。享天子用璧。享后用琮。用圭璋者。一王之後也。今經之言圭。非享圭也。蓋命圭也。詳堯典五瑞疏。說文云。周書曰。稱奉介圭。蓋多介字焉。詩韓奕云。以其介圭入覲于王。謂命圭也。大戴禮朝事篇云。奠圭降拜。升成拜。明臣禮也。奉國土所出重物而獻之。明臣職也。此朝而後享也。凡常禮朝無兼享者焉。經上文云。惟四月。此周之



孟夏於正歲爲仲春。蓋春朝也。通言之。四時皆曰朝。若孟子所謂諸侯朝於天子也。周之九服。其次五曰衛服。通言之。皆臣衛也。以衆而爲一二之稱。猶曰二三臣也。凡禮之言敢者。皆以明其謹也。昏禮言執鴈者。亦言奠鴈。蓋執而陳奠之也。引庭實者。儀禮覲禮文。蓋庭實所陳。亦在覲禮所享束帛加璧之外也。則此經可推也。祭義云。義者宜此者也。襄十四年左傳云。君義嗣也。引重耳者。禮檀弓言晉獻公之喪也。禮雜記於弔者。則云。主孤西面。弔者入。升堂致命。子拜稽顙。於含者。禭者。皆云。子拜稽顙。蓋子者。主孤也。適子爲後者也。含者。含玉。禭者。禭衣。皆喪禮也。周官云。司士正朝儀之位。孤卿特揖。大夫以其等旅揖。士旁三揖。

注云。特揖。一一揖之。旅衆也。大夫爵同者衆。揖之三。揖者。士有上中下。王揖之。皆逡遁。蓋王日視朝之禮也。則無王。答拜者也。周官云。司儀詔王儀。南鄉見諸侯。土揖庶姓。時揖異姓。天揖同姓。大戴禮朝事篇同。司儀注云。庶姓。無親者也。土揖。推手小下之也。異姓。昏姻也。時揖。平推手也。天揖。推手小舉之。蓋王朝諸侯之禮也。皆無王答拜者也。以此知朝而答拜者。喪禮也。蘇氏云。春秋傳曰。鄭子皮如晉。葬晉平公。將以幣行。子產曰。喪安用幣。子皮固請以行。既葬。諸侯之大夫欲因見新君。叔向辭之曰。大夫之事畢矣。而又命孤。孤斬焉在衰經之中。其以嘉服見。則喪禮未畢。其以喪服見。是重受弔也。大夫將若之何。皆無辭以退。今

康王既以嘉服見諸侯。而又受幣。使周公在。必不爲此。蔡傳從焉。然據諸侯以言此經。非其例也。夫天子之喪。其受冊命也。與禮言祭天地社稷之義同。其不敢凶服。禮也。天子嘉服而受冊命。諸侯既在矣。於是乎諸侯必朝王。明其宜嗣也。朝之嘉服。卽冊命時之嘉服。而不敢遽釋者也。若失諸侯之喪。未冊命焉。白虎通引韓詩內傳云。諸侯世子三年喪畢。上受爵命於天子。此王制所謂諸侯之世子未賜爵。視天子之元士以君其國者。豈同此王禮哉。然則異國之大夫求見主國之新君者。亦豈同此朝王之禮哉。大保暨芮伯咸進相揖。皆再拜稽首。曰。敢敬告天下。自此而下四節。以朝而進言。卽申顧命之義也。大保爲冢

宰。芮伯爲司徒。呂氏謂六卿前列是也。經言相揖。則其爲羣臣可知也。相揖承咸進而言。則其爲羣臣之進可知也。蓋冢宰及司徒皆進與羣臣相揖進也。皆再拜稽首者。明羣臣拜告者同也。曰者。大保一人奏羣臣所告者也。天子者。天之元子也。上文所謂王義嗣德者。嗣天子王也。以此明其繫天地社稷之重也。故敢敬告焉。蔡氏曰。進告不言諸侯。以內見外。

述曰。周官六卿之制。天官冢宰。地官司徒。實統乎春夏秋冬之官。蓋其前列也。

皇天改大邦殷之命。惟周文武誕受美若。克恤西土。美音誘以大邦殷爲言者。蔡氏謂明有天下不足恃也。誕大也。羣

古通牖。謂天所牖也。詩曰。天之牖民。若順也。謂天所順也。天之於民。必付大訓者。明善以牖之。則無不順者矣。無逸曰。乃非民攸訓。非天攸若。蓋天所牖而順者。天作君師之大命也。天大命以所牖而順者。文武則以大訓而大受焉。上文所謂陳敷集大命。下文所謂皇天用訓厥道也。恤憂也。言皇天改革大邦殷天子之命。以殷忝君師。不能大命以天所牖而順者也。惟我周大訓如文武大受乎天所牖而順者。以其能恤茲西土也。蓋以美若爲恤。下文所以言用奉恤厥若也。文武大受命而能恤天下者。先自能恤一方而見也。召誥曰。皇天上帝。改厥元子。茲大國殷之命。惟王受命。無疆惟休。亦無疆惟恤。故其言監于有殷者。必曰。

而稽天若。今之敬告者。猶召誥也。夫於天若者。面而稽之。非卽以牖之乎。

述曰。天之牖民。詩板文。若順。釋言文。孟子云。書曰。天降下民。作之君。作之師。蓋以君教爲師訓也。今詳逸文。蔡傳云。蘇氏曰。羨。羨里也。文王出羨里之囚。天命自是始順。又云。或曰。羨若。卽下文厥若也。羨厥或譌。蓋蔡以爲未詳也。繇今攷之。經文非譌也。羨里。猶闕里爾。今徒曰羨。如以闕之一言爲名。不可也。且羨里之囚。文王之事。此不可以父統子也。今安得兼言武王乎。釋文引馬云。羨。道也。書疏引王義同。詩板毛傳云。牖。道也。鄭箋云。道民以禮義。蓋羨與牖其義同也。史記云。帝紂乃囚西伯於羨里。漢書景十三王

傳作牖里。蓋古通也。詩板疏云。牖誘古通。韓詩外傳牖作誘。繇是言之。誘而道之。所以進善也。導古導字。詩野有死麕云。吉士誘之。毛傳云。誘道也。釋詁云。誘進也。說文羊部云。羴。進善也。又𠂔部。羴。重文作誘。古文作羴。蓋羴與誘其義亦同也。金氏據說文言之。以爲猶左傳言天誘其衷。是矣。然不承上文大訓而言。於義未融也。詩衡門序云。誘僖公也。論語云。夫子循循然善誘人。樂記引詩云。誘民孔易。亦詩板文也。毛詩作牖。蓋牖則道之明。而進之善也。是訓之順也。詩抑云。無競維人。四方其訓之。有覺德行。四國順之。易繫辭傳云。天之所助者順也。四國順之。蓋天順之也。然則以羴若爲愷者。何也。立政云。嗚呼。休茲。知愷鮮哉。而

於文王云。惟有司之牧夫。是訓用遠。又云。國則罔有立政。用愼人。不訓于德。是罔顯在厥世。於武王云。以竝受此丕丕基。此官人之訓。蓋誕受美若而克恤者也。卽黜民之類也。詩所謂黜民之民。謂人也。上下通言之也。僞傳云。文武大受天道而順之。此以誕受美爲言。於文未適也。江氏云。天改殷之命。惟文武大受而進順之。孫氏云。惟文武大受而善順之。皆於義未融也。

惟新陟王。畢協賞罰。黜定厥功。用敷遺後人休。

黜音堪。遺唯季反。

陟升遐也。蔡氏謂成王初崩。未葬未諡。故曰新陟王。是也。畢盡協合。敷克敷徧。遺貽也。賞者。天命所以章有德。罰者。天命所以討有罪。賞罰者。文武大訓之要也。凡賞罰之協。



於訓者必協民心而協天命。民心順之。斯天命順之矣。所謂美若也。然非審訓以察於自治之幾。則好惡皆非。而賞罰罔協矣。況其能畢協乎。惟成王嗣訓。盡合乎天命之賞罰。故文武之功有未定者。克定其功。若大誥所謂救寧武圖功也。用是徧貽後王之美矣。蓋此與成王顧命之義。皆相發也。

述曰。陟義詳君奭篇。曲禮云。卒哭乃諱。蓋諡以易名。則諱矣。卒哭。蓋既葬後也。郊特牲疏云。畢。盡也。敷。克。釋詁文。貽與。詒通。釋言云。詒。遺也。今轉注之。

今王敬之哉。張皇六師。無壞我高祖寡命。

皇。大也。師。衆也。六師。天子六軍也。六師者。民心之衆。天命

存焉。必其畢協賞罰。以天所屬而順者爲其兵訓。然後能  
張大之。蓋兵訓固大訓之要者也。高祖文王也。猶商書稱  
湯爲高祖也。詩之言文王曰。周王于邁。六師及之。又曰。文  
王受命。有此武功。蓋周有六師。始於文王。實天命之。此我  
高祖文王寡有之命也。武王以之伐紂而無壞焉。成王以  
之定周而無壞焉。今王嗣訓敬之哉。敬而得民心。以張大  
乎六師。將天命亦無壞矣。言天不改命也。○謹案蔡氏曰。  
張皇六師。召公此言。若導王以尙威武者。然守成之世。多  
宴安而無立志。苟不詰爾戎兵。則陵遲之漸見矣。故周公  
於立政。亦懇懇言之。後世墜先王之業。忘祖父之讎。上下  
苟安。甚至口不言兵。亦異於召公之見矣。可勝歎哉。嗚呼。

是其所歎。非一世然也。且六師之道。衆以張之。則不可一日而弛之。皇以大之。則不可他術而小之。先王之訓。繇乎典謨。皋陶象刑。固言兵也。豈以守成而始言兵邪。詩序曰。瞻彼洛矣。刺幽王也。思古明王。能爵命諸侯。賞善罰惡焉。其詩曰。以作六師。所謂思古者。文王在其中矣。詩序曰。皇矣。美周也。天監代殷。莫若周。周世世脩德。莫若文王。其詩於伐密曰。帝謂文王。無然畔援。無然歆羨。於伐崇曰。順帝之則。蓋帝謂者。推民心之衆而知天命也。是帝有所順。文王順之而無私也。所謂大訓而誕受。羨若者。於此見之也。所謂審訓而柔遠能邇者。亦於此見之也。此武功以文德而立也。詩序曰。常武。召穆公美宣王也。有常德以立武事。

因以爲戒然其詩曰整我六師不猶顧命之訓乎勝平聲

援音袁又于願反歆許金反羨錢面反

述曰白虎通云皇大也師衆易彖傳文釋詁義同天子六軍詩瞻彼洛矣毛傳義也文王之時以諸侯成六師及武王爲天子制六軍焉周官小司徒云五師爲軍司馬敘官云凡制軍萬有二千五百人爲軍王六軍又云二千有五百人爲師今軍師通言者詩棫樸疏引鄭釋臨碩難云春秋之兵雖衆萬之衆皆稱師是也易師九二云在師中吉无咎王三錫命此師之協賞也上六云大君有命開國承家小人勿用此師之協罰也王氏樵云張皇六師本畢協賞罰而言是矣然不承上文羨若而言於義未悉也祭肅

云。周人祖文王而宗武王。蓋康王謂文王爲曾祖。今言高祖者。謂功德高也。非謂曾祖之父也。昭十七年左傳稱鄭子云。我高祖少皞摯之立也。謂其始祖也。昭十五年左傳稱王謂籍談云。昔而高祖孫伯翳。司晉之典籍。謂其九世祖也。六師及之。詩。棫樸。文。有此武功。詩。文王有聲。文。詩。思齊云。刑于寡妻。鄭箋云。寡妻。寡有之妻。以言此經。則天命文王。蓋寡有之命也。僞傳云。寡有之教命。傳不以天命爲言。於義未融也。書疏引王云。寡命。美文王少有及之。王於文未洽也。陵遲者。岐隄也。言漸卑也。荀子云。百仞之山。任負車登焉。何則。陵遲故也。詩。皇矣。毛傳云。無是畔道援取。無是貪羨。鄭箋云。女無如是跋扈者。妄出兵也。無如是貪。

羨者侵人土地也。論語云。天何言哉。孟子云。天不言。以行與事示之而已矣。今詩稱帝謂者。大誓云。天視自我民視。天聽自我民聽。又云。民之所欲。天必從之。蓋推民心之衆而知天命也。

王若曰。庶邦侯甸男衛。惟予一人釗報誥。

自此而下三節。以朝而答言。卽亦申顧命之義也。侯甸男衛者。統舉之辭。故不言采也。周官曰。侯服歲一見。甸服二歲一見。男服三歲一見。采服四歲一見。衛服五歲一見。要服六歲一見。此來見之數。以始爲諸侯來見之歲而數之也。始爲諸侯者。先後不同。則一時而諸服有來見者焉。今經不言要者。舉今所見言之。要服適未至也。凡經敘諸服。

之文。言其遠者。統其近者。其尤遠者不言。則未至矣。洛誥之脫簡曰。侯甸男邦采衛。其不言要者。未至也。役不及遠也。酒誥曰。侯甸男衛。其不言采者。統舉也。衛遠而采近。告遠則告近可知也。召誥曰。侯甸男邦伯。其不言采衛者。未至也。役不遽及也。遠可統近。近不可統遠。今此經亦然也。禮。天子朝諸侯曰予一人。今稱予一人而名者。蔡氏謂在喪故稱名。春秋嗣王在喪亦書名也。報誥者。林氏謂諸侯戒我。故我以誥報之也。蔡氏曰。報誥不言羣臣。以外見內。要平聲之讀數去聲數之讀數上聲

述曰。釋文云。馬本從此以下爲康王之誥。又馬云。歐陽大小夏侯同爲顧命。今攷於經。當從其同也。引周官者。大行

人文。周頌譜疏引鄭云。獨舉侯甸男衛四服者。周公居攝六年。至此積三十年。再巡守餘六年。侯甸男要服正朝。要服國遠。既事遣之。衛服前冬來。以王有疾留之。此鄭以成王三十七年而爲之說爾。蓋周制十二年一巡守焉。鄭推以諸服來見之歲也。鄭亦據周官大行人也。然衛服因王疾而留。則要服雖遠。其義奚可遣之乎。且王疾不得見。又安所得既事乎。引禮者。曲禮文。禮疏引此經而說之云。稱予一人者。以受顧命。從吉。故暫稱一人是矣。然稱予一人而名。則其異於常禮者也。

昔君文武。丕平富。不務咎。底至齊信。用昭明于天下。則亦有熊羆之士。不二心之臣。保乂王家。用端命于上帝。皇天用訓厥道。



付畀四方。乃命建侯樹屏。在我後之人。

底之履反  
屏賓領反

此統羣臣諸侯而報誥也。不。大也。孟子曰。穀祿不平。今言平者。穀祿之平也。富者。賞之以祿也。周官曰。祿以馭其富。論語曰。周有大賚。善人是富。則無惡人致富而不平者矣。是大平富也。賞之協也。務。專務也。咎者。罰之以罪也。盤庚曰。非汝有咎。比于罰。不務咎者。非不咎也。鴻範曰。凡厥正人。既富方穀。是務德不務咎也。蓋惟於有咎而不可富者。則致咎焉。罰之協也。底。致也。富。則致其賞善之至。咎。則致其罰惡之至。富不能齊。而齊之以賞善之信。咎不能齊。而齊之以罰惡之信。賞罰之畢。協也。昭光。亦總也。熊羆之士。若牧誓所稱。如熊如羆也。謂猛士也。不二心之臣。若盤庚

所稱永肩一心也。謂忠臣也。惟賞罰光明則總有焉。以士  
心服而願爲之臣也。此皆足以張皇六師者也。又相也。端  
命正命也。易之鼎曰。君子以正位凝命。訓者大訓也。皇天  
用訓其道。猶論語稱天將以夫子爲木鐸也。顧命之篇。成  
王首曰審訓。實之曰文武大訓。故大訓爲陳寶之莫重焉。  
迨大史告康王者。必曰嗣訓。申之曰文武光訓。今康王推  
用訓於皇天。則終以一言蔽之矣。鴻範曰。皇極之敷言。是  
彝是訓。于帝其訓。今言天有其道。文武代訓之也。所謂誕  
受羨若也。畀與也。辟藩屏也。在存也。下文所謂心在也。我  
後之人者。康王我成王也。亦自我也。言昔聖君文武大平  
其賞善之富。不專務於罰惡之咎。致賞罰之至。而齊之以

信。用其畢協。賞罰者。光明于天下。則總有熊羆之猛士。不  
二心之忠臣。足以張皇六師者。保相王家。用正命于上帝。  
皇天用文武代訓其道。付其誕受。美若者。與之四方。先王  
乃命封諸侯。而樹四方藩屏。使諸侯存我後之人焉。蓋此  
與敬告者之義。皆相發也。故謂之報詰也。相去聲

述曰。不。大。釋詁文。引周官者。大宰文。互詳鴻範篇。詩召旻  
云。維昔之富。不如時。毛傳云。往者富仁賢。今也富讒佞。蓋  
不平之富也。釋詁云。務。彊也。蓋專務者。其力從而勉彊焉。  
昭二十四年左傳云。君其務德。言專務也。鴻範云。不罹于  
咎。此咎者。惡也。易解象傳云。又誰咎也。謂人有惡。而我咎  
其人。此罰之所繇也。呂刑云。上帝不蠲。降咎于苗。苗民無

辭于罰。蓋罰之以罪也。底致。釋言文。易乾文言云。知至。至之可與幾也。此致其至者也。大學云。見賢而不能舉。舉而不能先。見不善而不能退。退而不能遠。此不致其至者也。偽傳云。先君文武道大。政化平美。不務咎惡。致行至中。信之道。蓋傳以富爲美也。釋言云。齊中也。書疏引王云。文武道大。天下以平。萬民以富。立大中之道也。釋文云。馬讀底至齊絕句。江氏云。務趣咎災也。皆說文義也。文武大平富天下之民。使不趣于咎災。致行至中。其誠信用能昭明于天下。蓋與馬讀同。皆於文未適也。夫致至則中矣。論語云。中庸之爲德也。其至矣乎。致至者。致中也。齊信者。齊之以信。猶論語言齊之以禮也。猶禮言齊不齊以致其齊也。蔡

傳云。丕平富者。溥平富民。言德之廣也。不務咎者。不務咎惡。言罰之謹也。文武務德。不務罰。又云。底至者。推行而底其至也。齊信者。兼盡而極其誠也。蔡不承上文而言。於義未融也。以富爲富民。於經病添文也。論語云。庶矣哉。又云。富之。言富民也。承上文所謂庶者而言也。若夫論語以大賚言富者。詩序云。賚。大封於廟也。賚。予也。言所以錫予善人也。蓋大賚之富。言大封而祿之也。自官人言。不自安民言。今經亦言富。不言民也。蓋言富民。則富善人之義未明。言善人之富。則民之富在其中矣。能官人。無不能安民也。以此見經之善於立言也。昭光釋詁文。詩豐年云。亦有高廩。鄭箋云。亦大也。亦與奕通。釋詁云。奕。大也。蓋大總之義。

也。互詳皋陶謨疏。又相詳君奭疏。僞傳云。文武既聖。則亦有猛士忠臣。安治王家。傳以亦對既而言。是經所謂則者。於文未適也。蔡傳釋爲而又有。然經何以言則亦有乎。蔡傳云。康王言此者。求助羣臣諸侯之意。夫言求助。是矣。然康王言文武聖德。蓋言其畢協賞罰。能使有人才之助也。非言其既聖而又有助也。如其說。此經當有言予一人釗不德者。若上文所謂眇眇予末小子也。則可矣。今經無其文。是康王以既聖者自比也。欲求助而先自聖。可乎。陳氏雅言云。文武之聖。無賴於助。當時則亦有之。是不然也。文武雖聖。能無助而有天下邪。周官小司徒云。正歲觀教象之灋。徇以木鐸。蓋木鐸者。振之以警聽訓者也。論語封人

所稱。蓋言天將以夫子爲訓於後世也。皇侃疏引孔綽云。千載之下。其人已遠。木鐸未戢。乃知封人之譚信於今矣。廣雅云。訓順也。蓋訓者。所以爲順也。僞傳云。大天用順其道。此不以訓承上文言。非也。上文言美若者。美言訓。若言順。則經之稱訓。不兼順之義矣。顧命稱訓者六。皆謂大訓也。釋詁云。畀。予也。與。古通。予。屏義。詳君奭疏。在。存。釋詁文。襄二十六年左傳。稱衛獻公使讓大叔文子云。吾子獨不在寡人。吳語稱天子訊讓之言云。昔吳伯父不失春秋。必率諸侯以顧在予一人。蓋在者。心存之也。我義詳康誥疏。自乃命而下。蔡傳分節於下焉。於文未適也。且蔡於我後之人。不統以成王言之。則報誥無及成王者矣。敬告者言。

成王而報誥不及焉。非所以爲報誥也。然則康王於此。何以不特言成王也。敬告者以賞罰言成王矣。康王推賞罰於文武言之。皆以申成王賞罰之義也。吳氏澄云。言先王有臣。所以厲羣臣也。言先王建侯。所以厲諸侯也。

今予一二伯父。尙胥暨顧。綏爾先公之臣服于先王。雖爾身在外。乃心罔不在王室。用奉恤厥若。無遺鞠子羞。遺唯季反。鞠居六反。

此特呼諸侯而報誥也。羣臣常見。諸侯不常見。故特呼諸侯也。禮。天子稱同姓大國曰伯父。蓋呼伯父。則庶邦統焉。尙庶幾也。胥相暨與也。顧謂顧念也。綏安也。自上而安下者也。臣服猶上文臣衛也。蓋九服諸侯。以藩屏言。則曰臣衛。以治事言。則曰臣服。上文言建侯樹屏矣。是先王封國。



俾有所安而治事焉。故曰綏爾先公之臣服。猶盤庚言遷國。而謂我先后綏乃祖乃父也。今猶曰。尙胥暨顧于先王。綏爾先公之臣服。蓋倒文也。厥其也。厥若者。謂美若也。上言言文武誕受美若。克恤西土矣。是先王以美若爲恤。今用臣心奉先王而恤其若也。君奭曰。惟文王德丕承無疆之恤。亦此意也。鞠子穉子。康王自謂也。言今我一二伯父。庶幾相與顧念建侯安爾先公之臣事者于先王。雖爾諸侯身在外服。乃心無不在王家。用以奉先王恤美若焉。無貽我穉子之恥也。穉音稚

述曰。觀禮云。同姓。大國則曰伯父。其異姓則曰伯舅。同姓小邦則曰叔父。其異姓則曰叔舅。此天子呼諸侯之禮也。

曲禮云。五官之長曰伯。是職方。天子同姓謂之伯父。異姓謂之伯舅。九州之長。入天子之國曰牧。天子同姓謂之叔父。異姓謂之叔舅。繇是言之。則召公畢公皆同姓也。皆伯父也。召公爲冢宰而統羣臣。召公與畢公爲二伯而統諸侯。則呼伯父者。內外皆在其中也。今不以言此經。何也。蓋召公爲冢宰。畢公爲司馬。皆在內而非在外也。公羊傳言天子三公云。一相處乎內。則二伯亦在外矣。然召公始封。奚所謂爾先公平。史記謂武王封召公於北燕也。綏安釋詁文。僞傳云。庶幾相與顧念文武之道。安汝先公之臣服於先王而瀟循之。傳以爲安循。於經病添文也。蔡傳云。庶幾相與顧綏爾祖考。所以臣服于我先王之道。蔡以爲安

道亦於經病添文也。林氏云。諸侯祖父。嘗臣服于周先王。今汝當相與顧安之。顧念不忘。則先公在天之靈。於是安矣。此以爲綏安先公也。今攷綏者。以升車之綏推之也。蓋綏在車上。自下升車者。受之以安。故自上而安下。其義皆曰綏。詩烈祖云。綏我眉壽。詩離云。綏予孝子。其例也。今謂子孫綏爾先公。非立言之體也。詩樛木云。福履綏之。天祿安之也。詩南有嘉魚云。嘉賓式燕綏之。君命安之也。今承上文建侯而言綏者。蓋自上而安下也。詩桓云。綏萬邦。詩民勞云。以綏四國。此僖四年左傳所謂以德綏諸侯也。周官夏采云。以乘車建綏。注云。綏當爲綏。釋詁云。綏。繼也。孫氏以言此經。從顧絕句焉。謂庶幾相與顧在我。繼爾前人。

之臣服于先王。此破字釋之。非經本文也。其以顧在我爲言。於經病添文也。倒文之例。多士諸篇皆有之矣。詳康誥政人疏。盤庚云。猶胥顧于箴言。此顧于連文者也。漢書谷永傳。乃心引作適心。罔不引作無不。蓋文異而義不異也。僞傳云。當各用心奉憂其所行順道。蔡傳云。用奉上之憂。勤其順承之。此不承上文而言。皆於義未融也。蔡釋厥若者。於文未適也。鞠穉。詳康誥疏。廣雅云。羞恥也。穉子之羞。禮所謂國恥者也。

羣公既皆聽命。相揖趨出。王釋冕。反喪服。

此結上文既受顧命而朝享之事也。公者下尊其上之通稱。史以稱羣臣之三公及諸侯。故曰羣公。蓋言羣公則羣

臣諸侯皆統焉。釋冕反喪服。獨於王言之者。明羣臣諸侯之從王也。鄭氏曰。禮喪服。臣爲君。諸侯爲天子。皆斬衰。衰初

反回

述曰。春秋書公者。五等諸侯皆然也。則通稱可知也。白虎通云。尙書曰。王釋冕喪服。此今本脫反字爾。白虎通引此經而說之云。釋冕反喪。明未稱王以統事也。則所引經當有反字矣。鄭義見書疏。又鄭云。羣公謂諸侯與王之三公。諸臣亦在焉。鄭言諸臣。非也。諸臣之卑者。不稱公也。



尚書集注述疏卷二十五終

門弟子校栞於讀書堂